


雙  
槐  
歲  
鈔

三







雙 槐 歲 鈔

(三)

黃 瑜 撰

叢書集成初編

(補印本)

雙 槐 歲 鈔  
三 冊

一九三九年十二月初版  
一九六〇年五月補印

黃 瑜 撰

商務印書館出版

上海洪興印刷廠印刷

# 雙槐歲鈔卷第八

## 名公詩識

瓊州定安縣南有五指山。卽黎母山。瓊崖之望也。少保邱文莊公濬少時詠之。爲人所傳誦。詩曰。五峯如指翠相連。撑起炎州半壁天。夜盥銀河摘星斗。朝探碧落弄雲烟。雨餘玉筍空中見。月出明珠掌上懸。豈是巨靈伸一臂。遙從海外數中原。識者知其異日必貴。後竟如言。又聞夏忠靖公原吉少年極穎敏。或指屋上獸頭。使賦之。公卽口占曰。非龍非虎亦非熊。頭角皆因造化爲。不向草茅誇氣象。却於廊廟著威儀。昂昂飽歷冰霜苦。默默長承雨露滋。寄語飛飛諸燕雀。好來相近莫相疑。論者以爲居顯位而不免昵小人。此其驗也。詩言志者也。二公之志。見於詩矣。則其應驗。固理之自然者。世謂詩有讖。不可苟作。豈此類之謂乎。偶與客談及此。有舉高季迪啓所題筆峯詩者。雲來濃似墨。鴈去還成字。千載只書空。山靈怨何事。季迪辭侍郎不拜家居。忽罹黨禍腰斬。亦其讖也。

## 全寅王泰卜筮

全寅字景明。山西安邑人。少瞽而性聰警。乃學京房易。占斷多奇中。正統間。父清遊雲中。挾寅與俱。三邊吏士有問身体戚。及軍利鈍成敗。必就寅決之。由是名聞四方。己巳秋。虜酋也先大入邊。英廟北狩。陰遣使命鎮守大監裴當問寅。寅筮得乾之初九。附奏曰。大吉。可以賀矣。龍君象也。四初之應也。龍潛躍必以

秋應以壬午。泆歲而更龍變化之物也。庚者更也。庚午中秋。車駕其還乎。還則必幽。勿用故也。或躍應焉。或之者疑之也。後七八年必復辟。午火德之王也。丁者壬之合也。其歲丁丑月壬寅日壬午乎。自今歲數更九躍則必飛。九者乾之用也。南面子衝午也。其君位乎。故曰大吉。英廟心識之。時忠國公石亨以參將守雲中。賢寅引爲上客。動必咨之。暨景帝卽位。虜益熾。召亨還總京營。亨以清有幹略。薦以自輔。寅因侍行至京。時也。先復入寇。京師戒嚴。召寅問休咎。寅筮之曰。無能爲也。且彼氣已驕。戰之必克。虜果敗去。庚午也。先欲奉英廟北還。時率以爲詐。獨武寧伯朱謙上書懇請。朝廷持不敢發。寅力言于亨曰。虜人順天舉義。我中國反失迎奉之禮。獨不爲夷狄笑乎。亨遂與少保于謙協議遣使。虜果奉輿來歸。實庚午八月也。英廟以太上皇居南宮。錦衣指揮盧忠上變。外議滔滔。忠一日屏人請筮。寅以大義叱之曰。是兆大凶。死不足贖。忠懼而佯狂爲風狀。兩宮乃安。忠後伏誅。果如寅言。景帝弗豫。中外以儲嗣未定爲憂。寅言於亨曰。公國柱石。當委身致命。以安宗社。今危疑之際。不早定大計。禍且不測。亨意遂決。英廟復辟。將官寅寅固辭。乃命工范金鑄陰陽神靈四字爲筮錢十八文。又製象牙盒貯之以賜。又賜魚牙金酒盃一。白金彩幣若干。會清以指揮僉事出洩徐州。上曰。全寅得無偕往乎。其授錦衣衛百戶。在京居住。寅後固辭不允。見亨寵位已極。每筮以持滿之道。反覆戒之。弗納。卒及於禍。寅年近九十卒。又有王泰者。小名驢兒。濟寧衛人。雙目瞽。其一稍通明。賦性靈異。嘗遇一老嫗。授以陰陽一籍。居數日。嫗乃去。或曰。嫗老狐精也。泰賣卜。由是屢發屢中。人以爲神。都御史馬昂嘗微服訪泰。泰愕然謂曰。是何大貴人也。刻期某月日必

陸兵部尙書果然。漕運僉都御史王竑入覲。就問。秦曰。此去必陞。三年必有大禍。然亦有大名。至京果陞左副都御史。是歲甲戌也。丁丑爲石亨所害。除名爲民。復問之。秦又曰。公至某日。當有詔命。仍舊官。巡撫西北。及期。果如所言。指揮盧彬。金帶自東復開者三。秦曰。今夕有鋒刃之禍。是夕彬入舍。人王鸞家爲鸞所殺。其神妙如此。二人者可以備藝術傳矣。

### 唐試進士排律

唐試進士五言排律。例綴用六韻。天寶十年錢起及第。賦湘靈鼓瑟是也。詩曰。善鼓雲和瑟。常聞帝子靈。馮夷空自舞。楚客不堪聽。逸韻諧金石。清音入杳冥。蒼梧來怨慕。白芷動芳馨。流水傳湘浦。悲風過洞庭。曲中人不見。江上數峯青。可謂絕妙矣。世猶以兩不字少之。嘗有編錄試詩。自爲一編以傳者。然而無聞焉。莫宣卿者。開建人。唐大中間進士第一。今縣之金縷村。有宣卿讀書堂及片玉亭。水環之。流韻清響。父老呼爲龍吟水。然其言行爵位無傳焉。嘗得其詩於唐詩品彙。題曰。百官乘月早朝聽殘漏。疑省試所作也。詩曰。建禮儼朝冠。重門耿夜闌。碧空蟾魄度。清禁漏聲殘。候曉車輿合。凌霜劍佩寒。星河猶皎皎。銀箭尙珊珊。杳靄祥光起。霏微瑞氣攢。忻逢聖明代。長願接鸞鸞。吾廣狀元及第。實自宣卿始。

### 宋賜進士

宋制。進士先進詩謝恩。上有賜詩。復和之以進。度宗咸淳辛未。吾鄉狀元張鎮孫謝恩詩云。當宁宵衣務得賢。草茅何足副詳延。天人要語垂清問。仁敬陳言上奏篇。愧乏謀猷裨乙覽。忽驚姓字首臚傳。乾坤大

德知難報。誓秉孤忠。鐵石堅。御賜狀元。以下詩云。臨軒再策匪虛文。要語詒謀敢弗遵。昭格天心惟至敬。封培邦本在深仁。詳言喜見洋洋對。來譽知爲蹇蹇臣。始進便當思遠到。會須華國有儒珍。鎮孫和上云。聖主游心六藝文。先皇成憲日嘗遵。天人親屈九重問。嶺海同歸一視仁。已忝臚傳魁衆俊。復叨燕衍逮微臣。終身祇佩丁寧訓。遠到功名願自珍。當時所以貴士者至矣。今刻石廣郡學中。

夜見前身

大宗伯周文安公。洪謨中鄉貢。日舟泊邗江。夜見一異人。謂曰。吾卽子之前身也。前程萬里。終身清要。公曰。子何人。對曰。吾友鶴山人也。丁其姓。家維揚。及公官南京翰林。以詩訊維揚太守三原王侯恕曰。生死輪迴事杳冥。前身幻出鶴仙靈。當年一覺揚州夢。華表歸來又姓丁。侯得詩甚訝。集郡之耆老詢之。羅文節曰。友鶴山人。吾友丁宗啓之父。以詩名家。元末隱處。至建文元年。沒于成都。以儒雅重于藩王。有德人也。侯卽以此復公。世以爲異。如羊祜房琯之事云。然予竊疑之。公嗜學人也。精神恍惚。人或附會之耳。前此大宗伯毗陵胡忠安公。潑生而髮白善啼。有僧至門。謂曰。此吾師天池高僧後身也。示寂時。言當生公家。以一笑爲驗。果如言。易啼爲笑。近時進士太原王德華。瓊幼年能讀番經。恍然悟前身爲西僧。予竊以爲此皆豪俊之士。自詫神靈。以欺人耳。安足信哉。

河套墩臺

黃河套周迴六七千里。土肥饒可耕桑。三面阻河。切近陝西榆林堡。東至山西偏頭關。西至寧夏鎮。東至



二千餘里。南至邊城。北至黃河。遠者八九百里。近者二三百里。惟黃甫川稍近。逾河則唐三受降城。又東則舊東勝址也。國初虜遁黃河之外。正統初始度河來犯近邊。鎮守都督王楨始築榆林堡城。仍設法禦之。往北二三十里之外。沙漠平地。則築瞭望墩臺。虜窺境。卽舉烟示警。往南二三十里之外。則埋軍民種田界石。多於硬土山溝立焉。界石外開創榆林一帶營堡。累增至二十四所。歲調延安綏德慶陽三衛官軍分戍。而河南陝西客兵助之。列營積糧。以遏寇路。景泰初虜犯延慶。不敢深入。天順中阿羅出掠我邊人。以爲鄉道。遂至河套所在。入居其中。以伺機變。不時出沒。然猶不敢徑犯人家。自是虜顧居內。散漫潛住。而我列屯。反在其外矣。成化初邊人被掠日多。於是毛里孩糾衆深入。攻圍墩臺。而孛羅忽繼之。秋冬則舉衆爲寇。春夏則潛退河套。遠近軍民大被搶掠。阿羅出復勾引滿都魯。加思蘭聚衆益爲邊患。朝廷添調京營及大同宣府寧夏甘涼陝西護衛軍馬數萬。頒給銀兩。起倩陝西山西河南軍民。或趨運。或借撥。或糴買。或預徵。或開中。或採打。多方整理糧料草束。軍民困苦。不可勝言。復恐財力費耗。致生他變。止留大同宣府山西寧夏客兵。及兩班軍馬各一萬二千五百員名。相機戰守。議者嘗請於榆林堡立衛。猶未成也。都御史余公子俊始請以先年陝西清出遠年不明軍籍。及有罪責戍南土者之子孫。免其遠戍。就近編伍以實之。凡墩臺每座基各闊三丈。高三丈。對角懸樓二座。長闊各六尺。空內挑壕。塹闊一丈五尺。深一丈。依界石一帶。隨其山勢彎曲。剗削如城。高二丈五尺。川口去處。兩傍俱築大墩。撥軍防守。虜旣出套。乃東起清水營之紫城砦。西至寧夏之花馬池。延蔓幾二千里。每二三里間爲對角敵臺。崖砦連

比不絕。於其空處築邊牆者二。橫一斜一。如新月狀。以偵敵避射。凡爲堡十二。崖砦八百十九。小墩七十八。大墩十五。凡兩月而功成。然寧夏東路。自花馬池往西。爲黃河東岸平山墩。西路則爲黃河西岸黑山營。相距一百九十餘里。乃河套要害。停歇工築。蓋有待也。且又拓其城。比舊加廣。凡軍中器用。率范銅鐵爲之。又奏立衛學。以教軍中子弟。榆林俗不藝圃。乃求種教植。自是蔬果與內地等。又於界石外開地。以爲屯田。給軍民耕種。得糧十數萬石。以助經費。自是榆林爲重鎮。與寧夏甘肅鼎立爲三矣。入套之路。多由黃甫川南焦家坪。以兩岸夾山。冰先合後泮。此外則娘娘灘及羊圈子渡口。冬月冰堅。隨其所擇。而官軍駐劄。多在神木堡。或高家堡。莫能測也。成化十五年。滿都魯訖加思蘭死。其子僭稱小五子。弟亦思馬因僭稱太師。播遷宣大邊外。使有勇知之將。一鼓禽焉。徧搜匿套者。彼將喙息不暇。於是招募勇士。築城屯種。套中虜患或可除矣。

車戰器械

成化甲辰七月。余公子俊爲總督尙書。上言邊務曰。自古命將出師。誅暴禁亂。見可而進。知難而退。進退之間。非車不可。成周之世。如臨衝之伐。崇墉檀車之戰。牧野罪人斯得。明效足徵。迨至後世。如武剛車之走匈奴。偏廂車之平突厥。亦皆效其遺意。未嘗不成戰功。仰惟我朝制兵之法。超越前古。凡有征伐。所向無前。但承平已久。正統十四年京師戒嚴。成化十九年大同失利。振揚威武。正在此時。追憶天順年間。臣守西安。曾辦車料。送至寧夏。成造兵車。用無不利。至今賴之。臣今奉命以來。熟看大同地方山川平曠。宣

府地方一半相等。門庭寇至。車戰爲宜。臣等議得爲軍之計。大率以萬人爲一軍。戰車五百餘輛。用步軍十人。駕拽。行則繼以爲陣。止則橫以爲營。營車空闕去處。以鹿角柞補塞。凡戰士器械。不勞馬馱。乾糧不煩白齋。別處伏兵。亦以鹿角柞如車營。自衛以俟。若使虜賊合衆對壘。彼用弓矢。止有百步技能。我用鎗砲。動有三四百步威勢。如相持過久。彼將分散搶掠。我則隨處起其伏兵。或首遏其驕橫。或尾擊其惰歸。前項車營。取便策應。運無足之城。策不飼之馬。此億萬年守邊簡易之法也。乃具圖本。其一下兵車營圖。周圍用車五百輛。每輛轅長一丈二尺。拽車者每輛十人。鹿角柞五百副。肩柞者每副一人。俱步軍。共用五千五百人之上。車外壕闊深各一丈。營內可容馬隊官軍一萬五千人之上。可禦虜賊萬餘。其二擡兵車營圖。周圍外層用兵車五百輛。拽車者每輛十人。裏層用鹿角柞五百副。肩柞者每副一人。俱步軍。營內可容馬隊并官軍一萬五千之上。可禦虜賊萬餘。其三擡鹿角柞營圖。周圍用鹿角柞五百副。每副長五尺。用鐵打箍頭。鈎環聯絡。每副肩柞馬軍一人。共用五百名之上。營內可容馬隊官軍四五千之上。可禦虜賊千餘人。其四下椿繩營圖。周圍用椿繩五十副。每副椿十二根。繩十條。長五丈。闊一丈。椿繩外壕深闊各一丈。營內可容馬隊官軍二三千之上。可禦虜賊二三百餘。其五擡椿繩營圖。周圍用椿繩五十副。每副椿十二根。繩十條。長五丈。闊一丈。步軍一十二人持之。共用六百人。內可容馬隊官軍二三千之上。可禦虜賊二三百餘。凡器械。神鎗以竹爲翎。神砲以木爲矢。以鐵爲鏃。俱可致三四百步。每步隊十人。駕拽戰車一輛。輛用繩二條。圓牌二。旗一。砲四。車箱內安其三。虎尾上安其一。火桶二。各藏火箭十枝。

砲上用狼頭送子馬子圓石子并一窠蜂鐵彈碎石子包定火藥每馬隊則圓牌五神鎗五砲二鹿角柞連繩鐵鍬及鑿各二斧及剪錐各一其鑼鍋皮渾脫火鎌火藥與步隊同此中國之長技也予得其詳賦二詩以志喜曰靈夏城邊沙草春賀蘭山下少閑人神鎗火砲兼天起河套年年靖虜塵車騎連雲砲震雷邊牆如月接墩臺娘娘灘上河冰合不見胡兒牧馬來於戲若余公亦可謂壯猷者矣

西番遏狄

天順八年春二月甘肅總兵官宣城伯衛原正逕巡撫僉都御史吳輿璧環奉詔率師往平西番二公將中軍與其偏裨分五路以進甘涼蘭鞏山丹莊浪等衛所軍在行者三萬五千人追討至駱駝山寫爾冲殺唐川俘斬其酋及部屬萬餘得其雜畜十餘萬夫西番古之氐羌唐之吐蕃也其地西至于四川西北至于雲南西南至于陝西漢書所謂南濱析支至于河首者也尤切近甘肅常爲北虜右臂更互伸縮以抗中夏元得其地嘗郡縣之設官分職以吐蕃僧八思巴爲大寶法王大元帝師領其人民我朝洪武六年因其故俗以攝帝師喃加巴藏卜爲熾盛佛寶國師分設烏思藏朵甘衛二都指揮使司自指揮宣慰招討等司及萬戶府千戶所凡三十三處以官其酋長後分封爲大寶大乘贊化闡化闡教輔教等六王皆僧也旣髡首黃衣而僭尊制又假寂滅虛幻之術爲猖狂背叛之計至於入掠莊浪敢拒王師至是始殄服貢獻如常矣東井陳先生宣之政爲雲南憲副嘗見西番僧至滇遇旱能入海擒龍鉢中以劍擬之輒雷電而雨足履衢石深入數寸旣去則鞋迹存焉咒六畜生者輒死復咒之則死者再生此元人所以

尊信。加帝師號。至於皇天之下。一人之上。蓋懾其邪術故也。書曰三危既宅。三苗丕斁。以南蠻蔽西戎。今肅州地也。又曰織皮崐崙析支渠搜。西戎卽斁。今西番西南至甘肅。有崐崙山存焉。析支。卽今西番。有析支水存焉。渠搜。卽河套東南。有渠搜縣故城存焉。三國皆以織皮爲貢。卽斁云者。以次相聯。使屏蔽北狄也。三代因唐虞故迹。薄伐西戎。而獫狁襄矣。議者謂西番今旣貢獻。而大邊城。東自延綏黃甫川。西至寧夏紅山堡。豈無卽斁之地乎。或於偏頭關外娘娘廟。或於寧夏鎮外賀蘭山。使西寧衛官軍控領大寶法王等部落。往遏北虜出沒之路。或徑住河套。彼惑其妖幻。必不敢肆。亦制狄之大機也。南蠻有叛者。討平之後。亦必分北以雜西戎。如韃靼來降。遷於南土之法。諺曰。以夷治夷。用賊殺賊。我文皇帝崇禮西番尙師。徧爲建寺。蓋有意於此。惜乎當時無以唐虞故迹告之也。

#### 四代通禮

永新劉文安公。定之。與李學士克述。紹同陞庶子。劉學士宣化儼戲謂文安曰。先生眞庶子也。蓋公本庶出。遂默然無以應。初。其父石潭先生髦。將納其母側室。或謂不宜同姓。不從。及公請封。乃改爲留氏。鄉人嘗訐之。今觀丙辰進士登科錄。所書生母實劉氏也。其後將入祠堂。故爲異制。以諱乃翁之失。見諸呆齋存稿。中有家書云。奉先之禮。古來儒者。未必皆同。今亦豈能盡依朱子。欲作祠堂之時。整齊同作一大龕。龕中懸一軸。軸上書云。本宗劉氏門中三代考妣五服親疎神魂席公。號名儒。而其父亦敦古道者。其失欲蓋而彌章如此。禮貴謹始。可不鑒哉。今按唐制。大夫三廟。曾祖西第一室。祖禰以次而東。攷諸韓文可。

見矣。予初疑廟主之升祧。取日出沒之義。然朱子大全則謂席南鄉。以西方爲上。是或一道也。士夫祭四代。實自朱子家禮始。國初用行唐知縣胡秉中言。許庶人祭三代。曾祖居中。祖左。禰右。士大夫祭四代。當從時制。高曾居中。祖左。禰右。可也。公不從朱子。而國朝禮制亦不之考。謂之何哉。

始終清操

錢塘王文進琦。鄉貢試禮部乙榜。授泗州學正。擢監察御史。以學行老成稱。陞山東按察僉事。提督學校。士風爲丕變。改四川。不樂行。乞致仕。年纔五十。歸。以清介自將。在公門無私謁。平生不治生產。居閒陶如也。值歲大祲。無以朝夕。冬且莫。大雪。日僵臥。不能出門戶。有饋者。非有故舊。拒不受。卽故舊至。亦却之。有言者曰。當路甚重。公舉一言。何所不濟。乃自苦如此。琦曰。吾求無愧於心耳。心無所愧。雖饑且寒。無不樂也。何言之有。竟以饑寒卒。杭守胡濬聞而弔之。告于藩臬。祠諸杭學。鄉賢云。

棠花表節

封邱庠生彭儀妻吳氏。喪夫時。年甚少。亟欲以死殉。顧姑老子幼。乃止。不三載。姑亡。子歿。其母受巨室厚聘。欲改嫁之。吳怒曰。吾聞之。夫失節事極大。異日何面目見夫耶。卽更衣沐浴。潛至夫墓側。大哭。兩手扒土深尺。欲入墓。不得。哭益痛。至夜分。淚竭血繼。衣漬盡赤。自縊棠樹下。死。遠近聞之。往視。其面如生。見者莫不灑泣。鄉人共率錢買棺。與夫同穴。是歲仲冬。所縊棠樹。生花殊盛。雖罹風雪。不隕。蓋貞烈所感也。成化初。事聞。旌表。予嘗賦一絕云。夫君一逝恨無涯。直入泉臺作一家。歲歲雪霜彫不得。至今英爽在棠花。

自媿菲詞。未能揄揚其烈也。

### 貞燕烈鴛

元元貞二年。雙燕巢于燕人柳湯佐之宅。一夕家人舉燈照蠟。其雄驚墜。貓食之。雌彷徨悲鳴不已。朝夕守巢。哺諸雛成翼而去。明年雌獨來。復巢其處。人視巢生二卵。疑其更偶。徐伺之。則抱獨之殼爾。自是春去秋來。凡六稔。觀者譁然。目爲貞燕。成化六年十月。淮安鹽城大蹤湖漁人。見鴛鴦交飛。獲其雄。烹之。雌戀戀飛鳴。竟投沸湯中而死。漁人悲其意。爲弃羹不食。余稱之曰烈鴛。禽鳥微物。乃能如此。彼梁冀尙在。而孫壽私妓於秦宮。夫君已亡。而息媯偷生於楚國。何以爲人哉。因賦二詩。以愧不如鳥者。貞燕謠曰。貞燕貞燕。影皇皇。尾涎涎。去年雄共棲。今年雄不見。深沉簾幙花隨風。空梁獨宿思故雄。何人並臥甞餽月。羅袂鸞篋花影中。烈鴛謠曰。烈鴛可悲。雄已死。雌依依。寧向鑊中烹。不向湖上飛。生來相隨不相舍。如今奮翅同所歸。何事楚宮媯不語。露桃脈脈東風裏。

### 木工食一品俸

蒯祥者。蘇州人。永樂中。父福能主大營繕。爲木工首。以老告退。祥代之。丁酉扈從至北京。凡宮殿廟社。皆所從事。正統中。重作三殿及文武諸司。效勞尤多。天順末。奉璽書作裕陵。成化間。委任尤專。自工部營繕所丞。進所副。遂陟工部營繕司主事。員外郎。歷擢太僕少卿。遂爲工部右侍郎。轉左侍郎。其祿累加至從一品。成化辛丑三月卒。年八十四。嘗贈及祖父母父母。其子爲錦衣千戶。又蔭爲國子生。其祿壽蓋爲木

工者所罕見也。

三十六宮

邵子詩曰。耳目聰明男子身。洪鈞賦子不爲貧。須探月窟方知物。未躡天根豈識人。乾遇巽時爲月窟。地逢雷處見天根。天根月窟閒來往。三十六宮都是春。釋者謂漢天文志曰。氏爲天根。楊雄賦曰。西極月窟。是天根在卯。月窟在酉也。然先天六十四卦圖。以乾遇巽爲姤。姤當夏至。地逢雷爲復。當冬至。是月窟自午而後著於酉。天根自子而後著於卯。所謂理極微者是也。植物體冷而氣在外。根在下而親地。自一陰始。故探月窟而知物。動物體熱而氣在內。首在上而親天。故躡天根而識人。乾三畫對坤六畫爲九。兌四畫對艮五畫爲九。離巽俱四畫對坎震俱五畫各爲九。四九三十六。又乾一對坤八。兌二對艮七。離三對坎六。震四對巽五。亦三十六。皇極之學。以不用爲用。天有四時。而冬不用。子中所處也。處子中則陽自卯而開物以往。陰自酉而閉物以來。是閒來往也。由是八卦陰陽消長無窮。故謂都是春也。然復姤本六十四卦。以八卦言。殊訝其不類。今考朱子語類。謂易反對者。屯蒙之類。凡二十八卦。并不反對者。乾坤坎離頤大小過中孚八卦。爲三十六宮。蓋一陰一陽往來而成。先天一元之氣也。邵子之學。可謂奇而隱矣。當時猶不能知。況後世耶。

緣木求魚

鯢魚出峽中。如鮎。四足長尾。能上樹。天旱。輒含水上山。茹草葉覆身。張口俟鳥來飲水。因吸食之。聲如小



兒將食。先縛之樹。鞭之出汁如白汗。乃無毒。鮑魚出四川雅州榮經水及西山溪谷。似鮓。有足。亦能緣木。聲如兒啼。蜀人食之。孟子謂緣木求魚。理所必無也。然而物之不可窮者如此。天壤間亦何所不有耶。

### 尹氏八士

逸周書曰。王乃出圖商。至于鮮原。召邵公奭。畢公高。王曰。嗚呼。敬之哉。無競惟人。小人難保。后降惠于民。民罔不格。絲絲不絕。蔓蔓若何。豪末不掇。將成斧柯。王乃勵翼于尹氏八士。惟固允讓德降爲則。振于四方。加用禱巫。神人允順。又曰。王赫奮烈。八方咸發。約期于牧。案用師旅。商不足滅。分禱上下。尹氏八士。太師三公。咸作有績。神無不饗。王克配天。合于四海。惟乃永寧。由是言之。尹氏序于八士之上。蓋周以典神天爲重。尹氏其祝者也。及克殷。王入卽位于社。太卒之左。羣臣畢從。尹逸筮曰。殷末孫受。德迷先成。湯之明。悔滅神祇不祀。昏暴商邑百姓。其彰顯聞于昊天上帝。周公再拜稽首。乃出立王子武庚。命管叔相。乃命召公釋箕子之囚。命畢公衛叔。出百姓之囚。乃命南宮仲忽。振鹿臺之財。巨橋之粟。乃命南宮伯達。史佚。遷九鼎三巫。乃命閔天。封比干之墓。乃命宗祀崇賓饗禱之于軍。乃班。蓋其所重在典神天。其罪紂亦以此。詩曰。天保定爾。又曰。百神爾生。此之謂也。史佚卽尹逸也。伯達仲忽與南宮括卽八士之三也。其後皆爲周世臣。

### 祭公芮伯

逸周書雜錄有周之事。每段爲一解。有似書者。有似禮記者。然似書者。如程典商誓。皇門之誥。闕文尤多。

豈孔子刪餘殘剝至此邪。惟祭公之願命芮誥二篇。最爲完整。今抄于此。王若曰。祖祭公。予小子虔虔在位。昊天疾威。予多時溥愆。我聞祖不豫有加。予惟敬省不弔。天降疾病。予畏之威。公其告予懿德。祭公拜手稽首曰。天子謀父。病惟不瘳。朕身尙在茲。朕魂在于天。昭于王所。勗宅天命。王曰。嗚呼公。朕皇祖文王。烈祖武王。度下國作陳周。惟皇皇上帝。度其心。寘明德。付俾四方。用應受天命。敷文在下。我亦惟有若文祖周公。暨列祖召公。茲申予小子追學於文武之蔑。克龜紹業。以將天命。用夷居大商之衆。我亦惟有若祖祭公。執和周國。保乂王家。王曰。公稱丕顯之德。以予小子揚文武大勳。宏成康昭考之烈。王曰。公無困我哉。俾百僚乃心。率輔弼予一人。祭公拜手稽首曰。允。乃詔畢。桓于黎民。般公曰。天子謀父。疾惟不瘳。敢告天子。皇天改大商之命。維文王受之。維武王大尅之。咸茂厥功。維天貞文王之重。用威亦尙寬。壯厥心。康受乂之。式用休。亦先王茂綏厥心。敬恭承之。惟武王申大命。戡厥敵。公曰。天子自三公上下。辟于文武之子孫。大開方封于下土。天之所錫。武王時疆土。丕惟周之肇基。自后稷之受命。是永宅之。惟我后嗣。旁建宗子。丕惟周之始并。嗚呼。天子監于夏商之旣敗。丕則無遺後艱。至于萬億年。守序終之。丕乃有利于宗。丕惟文武由之。公曰。嗚呼。天子由我不則。寅哉寅哉。汝無以戾罪疾喪時。二王大功。汝無以嬖御人疾。莊后。汝無以小謀敗大作。汝無以嬖御士疾。大夫卿士。汝無以家相亂王室。而莫卹其外。尙皆以時中。又萬國。嗚呼三公。汝念哉。汝無泯泯芬芬。厚顏忍醜。時惟大不弔哉。昔在先王。我亦惟丕以我辟險于難。不失于正。我亦克沒我世。嗚呼三公。予惟不起朕疾。汝其皇敬哉。茲皆保之。曰。康子之攸。保勗教誨之。世祀

無絕。不我周有常刑。王拜手稽首。讜言。芮伯若曰。予小臣良夫。稽道謀誥。予惟民父母。致厥道。無遠不服。無道左右臣妾。乃違民。歸于德。德則民戴。否則民讎。茲言允効。于前不遠。商紂不道。夏桀之虐。肆我有家。嗚呼。惟爾天子。嗣文武業。惟爾執政小子。同先王之臣。昏行罔顧。道王不若。專利作威。佐亂進禍。民將弗堪。治亂信乎其行。惟王暨爾執政小子。攸聞古人。求多聞以監戒。不聞是惟弗知。后除民害。不惟民害。害民乃非后。惟其讎。后作類。后弗類。民不知后。惟其怨。民至億兆。后一而已。寡不敵衆。后其危哉。嗚呼。衆擾畜如之。今爾執政小子。惟以貪諛爲事。不勲德以備難。下民胥怨。財單竭。手足靡措。弗堪戴上。不其亂。而以予小臣良夫。觀天下有土之君。厥德不遠。罔有代德。時爲王之患。其惟國人。嗚呼。惟爾執政朋友小子。其惟洗爾心。改爾行。克憂往愆。以保爾君。爾乃贖禍。旣裁。遂弗悛。余未知王之所定。矧乃奠居。惟禍發於人之攸忽。憂重於人之攸輕。心不存焉。變之攸伏。爾執政小子。不圖善。偷生苟安。爵以賄成。賢智箝口。小人鼓舌。逃害要利。並得厥求。惟曰哀哉。我聞曰。以言取人。人飾其言。以行取人。人竭其行。飾言無庸。竭行有成。惟爾小子。飾言事王。實蕃有徒。王貌受之。終弗獲用。而相誣蒙。及爾顛覆。爾自謂有餘。予謂爾弗足。敬思以德。備乃禍難。難至而悔。悔將安及。無曰子譏。惟爾之禍。按謀父祭公名也。良夫。芮伯名也。禮記緇衣。引葉公之願命語。與此同。特誤以祭爲葉耳。此可見西漢以前。已行於世。不待晉發汲冢而後出也。明矣。

襄邸朝禮

諸王自谷府變後。鮮朝久矣。天順初。晉王請朝。詔止之。先是土木之變。襄憲王瞻塔兩疏慰安聖烈慈壽皇太后。乞命皇太子居攝天位。急發府庫。募敢勇之士。務圖迎復。仍乞訓諭郟王。盡心輔政。章上。時景泰立已八日矣。至是得諸宮中。睿皇覽之。感歎。勅取入朝。王遂戴星而駕。故事。當祭禁門而入。自遷都北京。來朝禮絕。適宗伯胡忠安。致仕去。莫有知者。待郎鄒榘掌部。檢太常典。故行之。初。景泰不豫。羣臣願復睿皇。惟內閣王文與太監王誠。欲立襄世子。陳循輩知之。已而景泰疾亟。太監興安。諷羣臣請復茂陵于東宮。僉以爲宜。王文獨曰。雖請之。知其欲誰立乎。學士蕭鉉曰。旣退矣。不可再也。故奏辭以請擇元良爲言。奏上不允。人競傳王文于謙已遣人齎金牌勅符往襄府矣。副都御史徐有貞及武清侯石亨都督張軏。張輓。鴻臚卿楊善等。共謀復辟。大監曹吉祥。蔣冕輩白太后勅焉。正月壬午黎明。亨軏以甲士入于南城。毀門迎睿皇復位。王文于謙皆以大逆棄市。始有貞猶豫。張軏楊善曰。不殺謙等。今日何名。遂決。或謂文與王誠初謀。謙未必知。金牌勅符在太后閣中。未嘗出也。然睿皇陷虜時也。先以復駕爲名。徑逼京師。謙使人謂之曰。中國有君矣。駕其毋復。至大同。定襄伯郭登言亦如之。矧謙總督軍務時。行事自專。爲亨等所惡。及駕復。上誥羣臣有喪師辱國有玷宗廟等語。實出內閣代言。故謙文懷疑不決。以至於此。然郭登雖犯上怒。惟削爵安置甘肅而已。使謙等早決大計。亦未必誅也。及襄邸來朝。上禮待甚隆。庚辰再朝。錫賚愈厚。其後世子。竟嗣王位。始終親睦無閒。然則迎立之謀。其實未發。益可知矣。謙等之死。亨軏實爲之上之盛德。曷嘗少累哉。要之憲王疏語。實爲至論。惜謙文循輩。見不及此。

## 玉堂賞花

文淵閣右植芍藥有臺相傳宣廟幸開時命工砌者初植一本居中澹紅者是也景泰初增植二本純白居左深紅居右舊常有花自增植後未嘗一開天順改元徐有貞許彬薛瑄李賢同時入爲學士居中一本遂開四花其一久而不落旣而三人皆去惟賢獨留人以爲兆明年暮春忽各萌芽左二右三中則甚多而彭時呂原文劉定之李紹倪謙黃諫錢溥相繼同陞學士凡八人賢約開時共賞首夏四月盛開八花賢遂設燕以賞之時賢有玉帶之賜諸學士各賜大紅織衣且賜宴因名純白者曰玉帶白深紅者曰宮錦紅澹紅者曰醉仙顏惟諫以足疾不赴明日復開一花衆謂諫足以當之賢賦詩十章閣院宮寮咸和彙成曰玉堂賞花詩集賢序其端謂昔韓魏公在廣陵時是花出金帶圍四枝公甚喜乃選客具樂以賞之蓋以人合花之數也予今會客以賞花初不取合於花數蓋花自合人之數也夫人合花數者係於人花合人數者係於天係於人者未免有意係於天者由乎自然雖然魏公四人皆至宰相豈獨係於人哉蓋亦合乎天數之自然矣花歇於前而發於今且當復辟之初實氣數復盛之兆所關甚大又非廣陵比也然不久諸學士中有從戎謫官者事見水東日記而不悉其詳故識之

## 馬恭襄殊錫

馬恭襄公景高昂河間之滄州人儀表俊偉聲音洪亮然無學術累官兵部尙書時宦者曹吉祥竊柄昂附之其嗣子欽冒奪門功封昭武伯驕恣狂狠爲衆所惡昂特薦欽得管大營尋掌前府禁兵天順辛巳

秋虜酋李來寇迤西。上命懷寧伯孫鏜帥師禦之。而以昂總督軍務。吉祥自石亨誅後。久蓄異圖。時以七月二日出師。欽遂約其兄都督鐸。從兄都督鏞。弟都督鉉。謀入宮行逆。約吉祥爲內應。并結韃官都督伯顏也。先等數十人作亂。是日都指揮完者禿亮詣長安門告變。夜二鼓。宮中聞變。詔侍直中官執吉祥。以俟天曙。四鼓。欽舉番漢兵犯闕。搥殺錦衣指揮遼果。擊內閣學士李賢。傷首。并執吏部尙書王翱於東朝房。鐸率數騎往西。殺左都御史寇深。斫傷廣寧侯劉安。焚東西皇城門及東華門。朝臣潰散。比曉。王師始集。詔會昌侯孫繼宗將之。督鏜諸軍先登。恭順侯吳瑾及諸將分道逆擊。昂以精兵殿之。自辰至午。鏞敗死。瑾爲欣所殺。相拒至酉。斬鉉。鐸於是欽入其家。溺井中。伯顏也先等縋城以遁。追獲之。是晚上出御午門。吉祥等下御史獄。伏誅。籍其家。以賞將士。論功加繼宗太保。刺進封侯。昂太子少保。仍掌兵部。自是上寵待特厚。賜金玉束帶繡金麟服。其餘銀幣玩器書畫禽鳥時鮮之寶。歲無虛日。衣有號撤哈刺者。雖勳戚不可得上。以賜昂。可謂殊錫也已。初昂以鄉貢入太學。選授鴻臚序班。正統丁巳。薦授御史。巡按有聲。癸亥。行在刑部。禁囚刼獄而逸。尙書以下咸禁錮跡捕。超陞昂右侍郎。後以副都參贊甘肅。迨旨致仕。景泰甲戌。起督兩廣。彙功至左都。天順丁丑。被論致仕。及入見。復留巡邊。還理院事。遂柄本兵。至是有功。得掩其薦欽之罪。而復留掌部。兩蹟復起。輒有奇逢。若此人。謂昂相貌有福云。

萬祺祿命

程子曰。三命律也。五星歷也。特人小用之耳。予按三命以太歲爲主。自天干地支納音三者。取用祿馬貴。

人羊刃劫煞之類。而審五行刑合生尅。五星以身命爲主。審生時所值七政四餘。遲速合伏向背空實。皆可斷吉凶。辨貴賤。世傳瓊瑤虛中沙滌斛斯琴堂諸書。至元人徐子平始專日主。增人元。取用益闕。而置納音不論矣。南昌萬尙書祺少遇異人相之。曰有僊骨否亦極貴。因留一書與之。乃祿命法也。於是精研以卜公卿貴人。多奇中。景泰閒。以吏辦事。吏部神其術。拜鴻臚序班。進主簿。景帝召見。有言輒驗。賜以白金綵幣。及不豫。有議召襄藩者。石亨以問祺。祺曰。皇帝在南宮。奚事他求。刻期復辟。與徐有貞仰觀乾象。合已而英廟復位。召視文華殿。卽日擢驗封主事。甫七日。進員外郎。無何進郎中。石亨敗。凡所引薦。皆坐譴。人爲祺危。祺自觀祿命。謂無事。言者論及。上果留祺。曹欽反。執王忠肅李文達。時祺在旁。欽問之。對曰。公勿負國。急宜以死上謝。則自求多福。又徐謂曰。尊翁碑文。非李公筆邪。公勿忘父。欽俛首。其兄鐸曰。萬君言是也。欽遂揖王李二公退。事平。上召二公及祺。問遇賊始末。甚壯之。賜燕勞焉。尋陞太常卿。累遷至工部尙書。吾鄉順德張御史叔亨。嘗會祺于易州。廠祺謂曰。公位至八座。卽休。當歇祿十年。且刻期當謝病歸。後果如其言。予亦喜玩此術。然求如祺之神奇。竟莫能也。

### 鵲橋僊

東莞方彥卿。後敏才博學。最善戲謔。作詩文。走筆立成。座中屈服。射詩釣韻。用輟耕錄。人鮮能之。又善意錢之戲。用九錢分三行。使人默識。第云在某行。自右末緯左。復自左上經右。始中如之。終則數曰。天人。天地。天天。地地。地地。天人人地。人天無不著者。又善拆字作謎。如上不在上。下不在下。不可在上。且宜

在下謂一字也。木了又一口。非杏亦非呆。勿作杳字說。勿作困字猜。謂極字也。自餘尤多。每在讌席。人樂近之。天順癸未。與予同會試。寓新安俞君玉家。正月六日。賀予縣弧。邀往預賞花。鐙。壁。精。蟹。薦。酒。戲。贈。子。詞。云。草。頭。八。足。一。團。大。腹。持。螯。笑。向。俞。君。玉。花。鐙。預。賞。爲。先。生。生。日。是。新。正。初。六。今。宵。過。了。七。人。八。穀。又。七。日。天。官。賜。福。福。如。東。海。壽。南。山。願。歲。歲。春。盃。盈。綠。借。螭。寓。子。姓。名。大。笑。曰。子。謂。韻。用。日。數。何。出。子。謝。不。知。則。曰。出。齊。東。野。語。七。夕。以。八。煞。爲。韻。子。忘。之。乎。卽。朗。誦。曰。鸞。輿。初。駕。牛。車。齊。發。聽。隱。隱。鵲。橋。伊。軋。尤。雲。帶。雨。正。歡。濃。但。只。怕。來。朝。初。八。霞。垂。彩。幔。月。明。銀。蟻。更。馥。郁。香。噴。金。鴨。年。年。此。際。一。相。逢。未。審。是。甚。時。結。煞。且。問。優。劣。予。曰。比。方。殊。欠。俊。耳。君。玉。亦。誦。其。鄉。先。生。方。秋。崖。除。夜。小。盡。生。日。詞。曰。今。朝。廿。九。明。朝。初。一。怎。欠。秋。崖。箇。生。日。客。中。情。緒。老。天。知。道。這。月。不。消。三。十。春。盤。縷。翠。春。缸。搖。碧。便。泥。做。梅。花。消。息。雪。邊。試。問。是。邪。非。笑。今。夕。不。知。何。夕。復。問。予。對。如。前。始。覺。予。指。其。姓。名。大。笑。浮。白。盡。懽。而。罷。詞。蓋。鵲。橋。僊。也。

草馬骨羊

雲南越睽故地之西。多薦草。產善馬。始生若羔。歲中紐莎糜。飲以米藩。七年可御。日馳數百里。世稱越睽駿。見唐書。西域人殺羊而食。埋其脛骨。舉杵堅築。久之。羔從脛骨而生。臍未斷時。馬傍踏振之。卽跳躍而起。入饌。肥腴最美。其皮宜作書褥。見吳萊淵穎集。吾廣溫燭鴨卵出雛。或以東廣火焙鴨。對西域骨種羊。予謂不如草馬之尤奇也。

妖僧扇亂



自中官崇尚釋氏。爲奸兇逋逃藪。妖書讖緯。惑民扇亂。正統間尤甚。羅浮有景泰禪師卓錫泉。宋唐庚作記可考也。少監阮能鎮守吾廣。信妖僧德存。創寺於白雲山半永泰泉上。指爲卓錫泉。景帝改元詔至。卽稱禪師出世。僞立寺額。遇聖節。輒爲賽會。立天龍八部。統領村民。將欲謀逆。人不敢言。及能取回。德存就擒。禍變乃息。予計偕北上。過蘆溝橋。聞趙才興之事。大率類此。才興扶風人。爲僧。創黑塔菴。自言知兵。武功右衛百戶趙忠。薦于朝。兵部送大同禦虜。無功。乃與廣通寺僧真海道人譚福通。號三結義。化緣修橋。聚衆立天龍八部。刻期稱帝作亂。真海素與義勇後衛百戶段旺母張氏通。媒其女妙果爲才興妻。立爲后。方舉兵。爲官軍緝獲。伏誅。景泰二年四月也。已而天台山僧章能謀亂。稱真明帝主。亦建寺募衆。與府軍前衛軍餘王斌同逆。事覺。能就擒。斌得脫。祝髮爲僧。名悟真。結菴於褒城之胡城山。誘流民作亂。建置百官。稱帝改元。立所淫女子王氏爲后。攻掠傍近諸縣。得數千人。爲漢中府官軍所擒。上命誅斌及同謀者。餘皆充軍。天順元年四月也。氣機乖戾。愚民從逆。如響斯應。可謂異矣。吳徵士與弼曰。除去宦官釋氏。乃成世道。噫哉言乎。

### 獄囚冤報

予鄉同年丙子解首梁僉憲景熙。叻弱冠連第進士。令蕭山。登朝爲御史。明敏善法律。遇獄囚輒筆殺之。惟妾一子。夜見枷鎖數囚。相謂曰。且侮弄渠孩兒何如。子條不見。明早得諸街上人家。又數日。景熙無疾。忽見數囚近前。扼其喉。大叫數聲。暴卒。予聞永樂中刑部墨侍郎麟。好折囚臂。指後患瘡腫。臂指斷落。乃

死。人命關天。宜有冤報也。

楸人妻

宣德中。賜太監陳蕪兩夫人。天順初。賜故太監吳誠妻兩京第宅莊田。見水東日記諸書。予按高力士傳。河閒男子呂元晤。吏京師。女國姝。力士娶之。元晤擢白刀筆吏。至少卿。李輔國傳。帝爲娶元擢女爲其妻。擢以故爲梁州刺史。朱子語類。梁師成妻死。蘇叔黨范温。皆衰絰臨哭。由是觀之。楸人有妻。古今所同也。京師人謂此曹男性猶在。必須近女。豈其然乎。

# 雙槐歲鈔卷第九

## 南京科道

憲廟初政。昏楮尤張。在朝無敢公言者。彭教廷對策。引用接見賢士大夫之時多。截去下句。是也。南京刑科結事中山陰王志默。淵金陵王尙文。徽氣誼相得。乃率同官言五事。一曰覽史書。謂古昔得失。載於前史。昔唐仇士良語同列曰。人主慎勿使之讀書。彼見前代興亡。心知憂懼。則吾輩疎斥矣。乞經筵兼講通鑑綱目。無所隱諱。朝夕取爲法戒。二曰開言路。諫官之言。有可採者。乞戒有司。勿令廢滯。權倖者不得假託以中傷之。三曰重大臣。選任府部卿寺。在外方面總兵。宜隆體貌。大罪不可宥。小過不可辱。庶人知自重。而名器尊。四曰選良將。近年將領。多以私暱進。繇本兵者非其人。先黜尙書昂。擇人以進退之。則將可得。五曰保全內臣。宜遵舊制。使無與國政。否則如王振曹吉祥。始雖愛之。及其敗而罪之。非保全之道也。近有無恥大臣。與之交結。或行扣頭之禮。或有翁父之稱。因而囑託。鬻獄賣官。擅作威福。事跡敗露。治以重刑。今後內臣。不許管軍管匠。置立田宅。其家人義男。悉究其來歷。發回原籍當差。仍嚴交結之禁。凡大小政事。悉斷自宸衷。惟與館閣大臣計議。則天下覩清明之政。而宦豎亦享悠久之福矣。保全之道。豈有加於此哉。上嘉納之。先是癸未七月。冊吳氏爲皇后。太監牛玉之力也。十月復下詔。言先帝臨御之日。爲朕簡求賢淑。已定王氏。育於別宮。以待期。不意內臣牛玉偏徇。已私朦朧奏請。將已退吳氏冊立。德不稱

位。不得已請命母后。廢黜吳氏。仍遵先帝成命。册立王氏爲皇后。然玉猶免死。惟謫南京。徵諗其故。謂淵曰。是可輕貫乎。遂率同官上疏。請明刑罰。以正朝綱。監往事以防後患。數玉大不睦之罪。四乞置諸法。因指斥執政。奏入。羣閣欲以危法中之。科道交章論掄。俱調遠州判官。徽普安州。淵茂州。餘不能盡憶也。初副都御史周銓。掌南京院事。追憾董糧。時諸御史劾其貪暴。數責之。置功過簿。詰旦而言。日晏不輟。如是者累日。十三道范霖楊永等不平。乃合疏銓平日不法事。聞於朝。驛召銓詣獄。銓亦許奏。既逮。至未白。而銓得心悸疾死。於是十三道或降或謫。而霖永以首建議。獨得重罪。永忿死獄中。會恤刑。霖得減死。出獄數日卒。正統丁卯六月也。輿論咸謂二王之罰。視前爲薄。憲廟之仁至矣。然自是言路風力。北不如南。時人謠曰。南京科道如猛虎。九年考滿陞知府。北京科道如綿羊。九年考滿陞京堂。實因二事而發云。

莊定山

莊定山先生孔暘。景記大梁書院。有云。善觀經書者。觀吾心之經書。郢人之運斤。九方臯之相馬。取乎內而忘乎外也。神交默契於不言。而圓融渾合於真靜。往年陳白沙過余。論及心學。余以是質之。蓋先生之學在是。而世以爲禪。但吾之所謂無者。未嘗不有。而不離於有。禪之所謂無者。未嘗有有。而實滯於無。禪與吾相似而不同矣。他日白沙贈李世卿序。亦云優游自足。無外慕。嗒乎若忘。在身忘身。在事忘事。在家忘家。在天下忘天下。世卿未必能與我合。其意正相符也。學士張東白。元禎寄詩曰。有著真無妙。無涵萬有粗。溺無寧有有。泥有定無無。口噤癡前夢。身勞醉裏扶。若爲逢有道。細與究圖書。蓋指此爾。景善爲詩。

詠包節婦云。二十夫君棄妾身。諸郎癡小舅姑貧。已甘薄命同衰葉。不掃蛾眉別嫁人。化石未成猶有淚。舞鸞雖在不驚塵。鎖窗獨對東風樹。歲歲花開他自春。羅一峯倫見之曰。可以泣鬼神矣。景不以爲然。惟乾坤鳶魚老眼。脚頭之類。自謂爲佳。如枝閒鳥共天機語。江上梅擔太極行。諸句是也。時稱陳莊體。先是倫抗疏論李賢奪情起復。謫福建副提舉。及成化丁亥十一月內閣分題。令翰林諸公賦詩爲上元賞玩。景時爲檢討。與編修章楓山懋黃未軒仲昭同疏。言去年以來遣人造楮。國家舊制也。一聞大臣之言而遂寢。節令宴樂。每歲常例也。一因大臣之疏而遂罷。向因災異勅諭羣臣同加修省。陛下從善如流。改過不吝。禹湯而後未之有也。今日之舉。或者兩宮在上。欲極孝養。然大孝在乎養志。豈以烟火爲樂哉。北虜毛里孩窺伺閒隙。所當深慮。江西湖廣一旱數千里。民不聊生。其他災傷處所尤多。未易悉舉。宜將烟火之事亦皆禁止。不使接於耳目。而移此視聽爲文王之視民如傷。爲大舜之聞善若決江河。省此冗費。以活流離困苦之民。賞征伐勞役之士。則干戈息。災異消。百姓富庶。四夷賓服。奉養兩宮。其孝豈有大於此哉。蓋懋筆也。奏入。上怒。杖之。調懋及仲昭知縣。景判官未行。用給事中毛宏言。改懋及仲昭南京大理寺評事。景南京行人司副。未幾倫亦召還。時謂翰林四諫。景後養病復起。爲郎中。考察去官。白沙聞其有疏。謂無一分可說。不知此際靜如何也。

### 追復位號

天順元年二月乙未朔。廢景泰仍爲郕王。歸西內。皇太后制諭也。戊戌。命郕王所立皇太后吳氏仍號宣

廟賢妃。皇后汪氏。復爲郕王妃。懷獻太子見濟。爲懷獻世子。肅孝皇后杭氏及貴妃唐氏。俱革其名號。欽天監奏革除其年號。上曰。朕心有所不忍。仍舊書之。癸丑。郕王薨。葬祭禮如親王。諡曰戾。唐氏等妃嬪。俱賜紅帛自盡。以殉葬。成化初。追諡郕戾王爲恭仁康定景皇帝。後汪妃薨。亦追諡景皇后。予按建文之自焚也。祭葬以天子之禮。未嘗被廢。故駙馬都尉梅殷。軍中發喪縞素。諡爲孝感。然非上意也。例宜追復位號。一如景泰。其當軸者之責與。

林玠降箕

侯官林廷珪。玠。天順壬午。年二十。領鄉薦。至成化乙酉。弟廷玉。璿。亦領薦。同赴會試。至鵝湖驛。玠得疾。瑯扶以歸。甫及門。卒。其魂鬱不散。家人每接之。夢寐彷彿。聞其聲跡。靈几閒器物。或自動。乃如紫姑神法。置箕布灰於几。箕輒自舉。遂令人扶之。箕運不休。就視。則皆詩文也。別父母有句云。如今我已終天別。何計能酬寸草心。別兄弟云。鴻雁層雲憐隻影。池塘芳草憶殘春。別妻云。寄言與爾無他說。節義冰霜不可虛。賦書樓極目云。清風搖動硯池雲。飛鴻點破江山影。觀蓮云。呼童泛美酒。對此紅芳傾。若人已僊去。此花空自馨。作文贈序。凡七十餘首。家人次以成編。自名之曰靜庵遺玉。序之有曰。玉之體雖藏於山。而其德自弗泯焉。蓋以自況也。初。箕動成文之時。親友臨者。毛髮竦豎。久之。則答問如平生矣。如是年餘。乃已。瑯後爲御史。提學南畿。語人如此。而其妻守志。果不虛冰霜之戒云。

伏闕泣諫

伏闕泣諫。自唐宋以來有之。成化四年六月。慈懿皇太后錢氏崩。憲廟嫡母也。詔大臣議葬所。衆相視莫敢先發。大學士彭時謂同朝曰。梓宮當合葬裕陵。主當祔廟。無可議者。卽與禮部尙書姚夔定議。具疏引漢文帝合葬呂后。宋仁宗合葬劉后故事。乞念綱常之大體。先帝之心。必求至當。此莫大典禮。萬一有違。在廷百辟。將有言之。宗室親王。將有言之。天下萬世。亦將有言之。豈能保其終無據理。改而從正者乎。上猶重違母后之意。未允。時率羣臣伏文華殿。以請。號哭不起。上聞之。使中官宣諭。使衆官退。翰林中有呵中官使還者。衆官皆曰。死不敢奉詔。且不得命。不敢退。時與學士商輅。劉定之。進曰。人心如此。實天理所在。望朝廷俯從。於是中官入奏。上感動。母后亦悟。卽傳旨諭羣臣曰。卿等昨者會議。大行慈懿皇太后合祔陵廟。固朕素志。但聖母疑事有相妨。未卽俞允。朕心終不自安。再三據禮。所幸聖慈開喻。特賜允諾。卿等其如前議施行。勿有所疑。故諭衆聞命。咸呼萬歲而退。蓋此事非上曲全孝道。何以至此。真盛德主也。

### 詠竹言志

棗陽王良璧。瑛初領薦至京。與予談論。輒相契合。自是日相往來。及予授官。追送至張家灣。然後返。成化乙未。第進士。授行人。擢御史。巡按蘇松有聲。吳地號繁劇。徧詢輿臺。巨奸宿蠹。一剔而盡。平生清苦。人所不堪。卒之日。衾櫬不備。合臺助焉。嘗題夏太常景墨竹贈予曰。幽人研玉露。寫此青琅玕。清標正相似。翛然同歲寒。蓋言志也。景本名昶。字仲昭。東吳人。登進士時。冒姓朱。後復其姓。以善書徵入翰林。文皇以所書爲第一。顧見其名。謂曰。太陽麗天。照臨萬國。日宜書在永上。景頓首受命。士夫以爲榮。一時同名者皆

改焉。國朝畫竹自毘陵王中舍孟端絳後。惟景精絕。

建州女直

女直。金之後也。洪武初降附。永樂中設奴兒干都司。統建州等衛所二百有四。世受官賞。爲不侵不叛之臣。初建州海西兀者等衛夷人。先居斡木河。與七姓野人有讎。投奔朝鮮。復爲所戕。乃復歸附。朝廷處之遼陽。迤東蘇子河一帶。遞年往來朝貢。成化丙戌。背義搶掠人畜數萬。天威震怒。將元惡董山等二百五十餘人。俱留廣寧。監禁致死。乃調大軍。抵巢征勦。未有成功。己亥九月。賊首刺達等。猶爲邊患。巡撫都御史陳鉞。總兵歐信。從饅頭山。嶺口等處攻之。斬獲賊首二百餘級。全軍而還。復分兵於遼陽。迤東五堡。北接撫順城。南連鳳凰山。林木稠密處。按伏以守之。己亥。賊首伏當加糾三衛入寇。命撫寧侯朱永總兵。中官汪直監其軍。陳鉞贊畫往討。破其營五百餘所。焚廬舍二千餘間。獲馬及軍械倍之。永由是進封保國公。然其後讐我大邦。益肆猖獗。女直自此叛矣。

彭陸論韻

古人用韻。大率合六書諧聲而來。往往通而不拘。如六經可見已。宋吳棫才老韻補。乃據唐宋諸文士以律古人。是不足爲準也。成化初。陸諭德鼎儀。鉞大不然之。彭學士彥實華與之書曰。夫有聲而後有字。合字與聲而後有韻。書韻也者。類其聲之叶者也。使古韻書盡存。則古人字音。固可盡得矣。古韻至魏晉時。尙多知之。宋齊而下。浸以湮滅。然有博雅好古之士。若唐韓退之。柳宗元。白居易。宋歐陽永叔。蘇子瞻。子



由猶能深考古韻而用之。夫謂之古韻。則古人字音。與後人有不同。明矣。詩三百篇。強半出於閨門里巷。其所韻非當時語而何。且一字而有兩音者。如左右之類。三音者。如樂惡之類。四音者。如行與絳之類。古今人皆然。何獨謂明鳴二字。古人未必讀爲芒。特叶韻時強轉其聲邪。足下謂明鳴等字。今人未嘗讀爲芒。古人之音。不應大相絕如此。夫沈約距今纔幾時。而今之韻。於支與微之類。合其二而爲一。麻與遮之類。分其一而爲二。其不同已如此。而況數千百年。欲其一。一若自一口出。得乎。如今人讀服爲房六切。而服之見於詩者。皆當爲蒲北。無與房六叶者。古人未嘗讀爲房六也。今讀慶爲邱正切。而慶之見於易詩者。皆當爲驅羊。無與邱正叶者。古人未嘗讀爲邱正也。左傳以皮叶多。坡以皮得聲。則皮初讀爲蒲波切。轉而爲蒲麋耳。顏延年以霾叶施。霾以狸得聲。則霾初讀爲陵之切。轉而爲亡皆耳。莫之取義。日在罌中也。後人乃妄加以日字。臺之取義。築土堅高。能自勝特也。後人乃訛轉爲苔音。若此者。未可遽以一二數。姑就足下所及者而言之。夫古今人不同多矣。試以字文韻語觀之。字自蒼頡。古文變而爲籀篆。又變而爲小篆。又變而爲隸。又變而爲楷爲草。以今之草。律石鼓之古文。吾不知同邪異邪。詩自三百篇。變而爲離騷。又變而爲五言。又變而爲七言。又變而爲近體爲小詞。以今之詞。律雅頌之古句。吾不知同邪異邪。凡古之禮樂制度。後世廢易殆盡。所幸存而未泯者。賴有載籍之傳焉。字之音韻。亦猶是也。於今可見古人音考者。獨賴經傳中韻語耳。足下因古人之叶韻。非今人之所讀。遂謂古人強轉其聲。何溺於今而誣古人也。彭所論如此。惜陸所與書無聞焉。

龍洲魁識

泰和古名西昌。芳洲陳閣老德遵。循家於東城。永樂甲午鄉試第一。明年禮部會試第二。廷試第一。先是嘗有識云。龍洲過縣前。泰和出狀元。至是楊文貞公士奇爲諭德。在南京寄二絕。其一云。龍洲過縣千年識。黃甲初登第一名。從此纍纍題榜首。東城迎喜過西城。其後六年辛丑科。城西曾鶴齡舉進士第一。後十八年爲宣德癸丑。真定曹鼎爲泰和典史。亦進士第一。文貞以爲詩識。而其初則爲芳洲發也。至成化十四年戊戌科。曾彥復爲進士第一。邱文莊公潛時爲祭酒。以其門下士也。爲綵聯以迎之。云。江右賢科十回虎榜。魁天下。西昌文運三應龍洲。過縣前。蓋不數曹者。以曹乃宦遊人故耳。龍洲在縣治南。三人登魁時。亦未嘗見其過縣前也。民之譌言。遂成識耳。

妻救夫刑

國朝妻救夫刑。蒙恩獲宥者二人。永樂甲申十一月。江浦知縣周益。以罪當刑。其妻楊氏。訴益母老。願代益死。上憫其情。特宥益。成化丁酉三月。河東驛丞王佇。奏知州徐孚妖言。律斬。孚妻李氏。奏言翁姑年老。願代孚斬首抵罪。奉旨俱釋之。此二婦可謂義烈。而朝廷寬宥不疑。眞堯舜之仁也。予聞洪武中。給事中侯庸。請代其父監生程通。請代其祖永樂中舉人郭魯。請代其父。皆削軍伍。以全其孝。世猶侈爲美談。而況婦人當死生之際哉。可以爲難矣。

山阜變占

成化庚子閩之長樂十八都昆由里平地突起小阜高三四尺人畜踐之輒陷鄉人聚觀以爲異明年復於其左湧起一山廣袤五丈餘占者曰女主爲男之兆武后時有此變幸其小耳時裕陵宮人萬氏册爲貴妃最被寵幸每侍宸遊戎服男飾以從上益愛之此其應也乙巳二月丁巳四鼓泰山微震三月壬午朔四鼓大震入夜復震丙戌四鼓復震甲午乙未相繼震庚子連震二次有司奏聞時椒寢漸繁上有易樹意而未宣露會內臺奏言泰山震動應在東宮上大驚意遂已其驗如此

### 瑞夢堂

祁陽甯竑有瑞夢堂諭德王德輝華記之記曰成化甲午歲當大比於時大司馬松江張公時敏方爲吾浙提學首以華與今大學士謝公於喬薦於主司其年謝公遂發解第一華獨見黜復歸讀書龍泉山中方伯祁陽甯公元善忽以書幣來聘予爲其子竑講學迺自浙抵祁陽居於梅莊書屋明年乙未謝公狀元及第公聞之以書來賀曰先生與謝君齊名於時今謝君及第此亦彙進之兆也良不佞敢爲先生賀華閱書謂竑曰尊公此言慰余客中落莫之懷耳豈真謂余能然置書篋中初亦不念動也是夜余就寢忽夢歸吾邑如童稚時逐衆迎春東郭門外衆昇白色土牛一覆以赭蓋旌纛旛節鼓吹前導方伯昌黎杜公益之肩輿隨於後迺邈自東門入至余家迺止既寐未解所夢質明是爲端陽前一日竑侍余晨舖因語之夢竑俯不應久已迺屈指迴輪者再作而復余曰是狀元之兆也家君之賀非誣矣余曰何居竑曰牛一元大武也春歲之首而試之期也夫狀元時亦謂春元也金色白其神爲辛牛之神丑也中之歲

其以辛丑乎。余曰：鼓吹前導者何？曰：是蓋恩榮次第。所謂傘蓋儀從送歸第者也。余曰：奚爲而杜公隨之？曰：以傘蓋從者，實京兆尹。昔江西李公裕以方伯尹京兆，是歲也。京兆尹其杜公乎？余聞而笑曰：嘻，有是哉？子之言殆隍中之鹿也。竑遂請爲記。余曰：徵而爲之，其既晚乎？竑乃私識於禮經之卷末，而以復余曰：願先生無忘今日之言。余曰：諾。歲丁酉，余復黜於主司，奔走江湖，日斯邁而月斯征，夢之真妄，不復記憶。庚子，迺領薦鄉闈。明年辛丑，試春官，得雋，入奉臨軒之對，果叨進士第一。傳臚畢，承制送予歸長安私第者，又果杜公也。一時湖湘章逢之士，遂盛傳是夢以爲祥。竑乃易扁梅莊書屋爲瑞夢堂，而數書請如約爲記。且曰：先君之書，亦庶幾知言者。梅莊地靈，實與聞先生之言，敢固以請。余惟晝之所思，夜之所夢，商宗之夢見傅說，思得良弼也。孔子之夢見周公，思行其道也。近世科目之士，雖以狀元及第爲榮，而余之心思，則未嘗及此。然此夢徵於六年之後，若合符節，毫釐不爽。豈所謂禎祥之先見者邪？余自及第迄今，具員侍從，幾二十年，曾未能如傅如周，以對揚明天子之休命。願徒誇詡於一夢之榮，以爲之瑞而記之，亦且陋矣。第以竑之請，屢至益勤，而夙昔之約，有不能以終違者，遂爲備錄。顛末以塞其請，且以見夫人之窮通遲速，固有一定之數，而不可以趨避爲也。竑亦丙午貢元，不願祿仕，詔授散官，其占是夢，人稱其穎悟云。

文武換易官秩

憲廟憫于少保之死，賜諡立祠，擢其子千戶冕爲應天府尹。此以武秩換文也。永樂中，祥符張信自鄉舉

積官侍郎。與英國公張輔同族。改四川都指揮僉事。近則成化辛丑進士夏邑梅純。以駙馬般之後。爲中都留守。此以文秩換武也。舉人爲武官尤多。如駙馬周景之子賢。中丙午鄉試。赴禮部場屋。太后遣人畀酒食入視之。及下第。授指揮同知。世亦詫以爲異。

### 會試論表

會試錄。洪武初。惟刻序及執事。與中式姓名。暨三場題目而已。乙丑戊辰。始刻文。而錄不可見。辛未。惟傳許觀經義一篇。其論題。洪武則大德受命。甲戌。持心操節。丁丑。春秋大一統。建文庚辰。永樂則治國平天下。甲申。禮樂明備。丙戌。洪範九疇。己丑。君子篤恭而天下平。壬辰。大人與天地合德。乙未。正誼明道。戊戌。經綸大經。辛丑。天人一理。甲辰。宣德則聖人之大寶。丁未。聖人法天立道。庚戌。聖人以仁育萬民。癸丑。正統則聖人人倫之至。丙辰。誠者聖人之本。己未。仁統天下之善。壬戌。至誠立天下之大本。乙丑。舜爲法於天下。戊辰。景泰則孟子功不在禹下。辛未。大舜善與人同。甲戌。天順則中正仁義而主靜。丁丑。心妙性情之德。庚辰。聖人在天子之位。甲申。成化則天子建中和之極。丙戌。孔子立萬世常行之道。己丑。子授官後。不能憶其餘也。所擬表。洪武永樂中。祥瑞稱賀爲多。如野蠶成繭。五色卿雲之類。近始易以進書授官。漸與昔異矣。

### 援例入監

祖宗以來。最重國學。慎選貢徒。文行兼備者。積分自廣業堂。升至率性堂。卽得銓選京職方面。與進士等。

洪武乙丑會試下第舉人與赴禮部不及試及辭乙榜不就職者皆得入監永樂初翰林庶吉士沈升建言濫預中式者近年數多宜加精選方升國學蓋亦選俊法也景泰改元詔以邊圉孔棘凡生員納粟上馬者許入監限千人而止然不與饌餼人甚輕之成化己丑進士安邑張璠當在首甲以援例抑置二甲第一成化甲辰山西陝西大饑復令納粟入監兩閱月放回依親有告願自備薪米寄監讀書者聽尋令監生年二十五歲以上方準食糧收撥其省費如此邱文莊以禮侍掌監事季考以南城羅玘爲首曰此解元才也取之者其惟李賓之程克勤乎是年丙午京闈果二公主文柄論題仁者與物爲體玘以無我則視天下無非我立說理旣明暢詞益奇古參以前後場俱稱遂置首選連第入史館文名震於海內於是援例之士增價矣

龍與蜘蛛鬪

酉陽雜俎載蜘蛛有大如車輪者人多不信成化七年薊州盤山有大蜘蛛與龍鬪爲龍所斃野人獻其皮如車輪然乃知段氏所云不我誣也天壤閒亦何所不有哉人局於見聞則陋矣盤山一名盤龍山在薊城西北二十五里高二千餘仞周百餘里其高峯曰上盤絕頂有二龍潭禱雨輒應蓋靈境也

京官折俸

高皇帝時京官支全俸外尙多歲時賞賜正旦元夕冬至例賜酒米錢永樂閒營建北京乃定每歲京官之俸春夏折鈔秋冬則蘇木胡椒五品以上折支十之七以下則十之六其十之三若四米也是時鈔重

物輕公私兩便。宣德中禮書胡濙攝戶部事。始請米一石折鈔二千。然物日以重。鈔日以輕。軍國之需益繁。折支曠數。歲僅一給。成化五年。御史李瑑監內帑出納。見紵絲綾羅紗褐繒布之衣。輒衾褥。以及書畫几案銅錫磁木諸器皿。皆委積塵土中。日久腐壞。將歸於亡用。乃請以充俸鈔。制曰。可以。是藏吏檢會。駟儉估直。枚識之。聽各衙門具數。委官領出。分授各屬。然自後亦數歲一行。有終任弗及支者。若鈔則支者日益罕矣。

### 援溺得子

成化初。高郵衛有張百戶者。備漕運差使。將過家料理。別顧小舟而行。渡湖風作。舟覆。僅獲免。乃懲險。從湖堤陸行。至半途。望見一覆舟。浮沉波上。有人踞舟背。呼號求援。烟霧中了不可辨其爲誰。張心憐之。呼岸傍小漁艇。俾往援。不肯。則解裝出白金十星與之。乃行。援之至。則其子也。因候父而來。遭風溺者半日。出自水。尙振掉不能言者久之。稍遲則葬魚腹矣。人詫爲異事。豈父子天性。默相感通邪。不然。行旅絡繹。寧無一人惻隱者而援之。乃獨張邪。

### 六臣忠讜

語曰。日月欲明。浮雲蔽之。成化間。儉邪雜進。左道亂政。然賴有六臣焉。內閣商公輅。劉公瑄。都臺王公恕。鄭公時。府丞楊公守隨。刑曹林公俊。忠讜格君。其何傷日月之明哉。丙申七月。黑眚傷人。京城騷動。人持兵刃。晝眠夜作。說者曰。陰盛之狀。又曰。胡虜之兆。旬餘無敢建言者。劉公首請開言路。上嘉納之。已而妖

狐夜出。山西安男子侯得權。詭姓名李子龍。謀入內爲逆。伏誅。乃開西廠靈濟宮前。詔太監汪直領官校百餘人刺事。立威恣肆。京官三品以上。擅自抄札。內外恟恟。商公疏直十罪以聞。上不省。劉公復疏言東廠之設。實自建立北京之初。專爲緝訪謀逆妖言大奸大惡等事。止令內臣提督若干。犯法典仍下所司究治。一時權宜。因而不<sub>易</sub>。今增設西廠。非舊制也。立廠之後。事情紛擾。於國家安危關係非小。伏望革罷。以安人心。不避震怒。再此申瀆。上使懷恩詰責。二公力辯。始詔革去。而商公遂見幾告歸。太監梁芳進淫巧以蕩上心。收買奇玩。引用方術。以錄呈異書爲名。夤緣傳旨與官。已官者輒加超擢。不擇儒吏兵民工賈囚奴。至有脫白除太常卿者。名曰傳奉官。多至數千人。而僧道樂工之躡其儕者。又不足數。李孜省。僧繼曉。尤尊顯用事。妖人王臣。嘗爲姦盜。被楚傷脛。號王癘子。凡物經其目。卽能竊去。或手取人財物投水中。輒自袖出。內豎王敬。挾臣采藥江南。橫索貨寶。痛箠吏民。吳越大被其害。嘗覓金蜈蚣。拷訊無有。里胥通賄。乃喜。令置酒遊山。酒半。燁燁樹間。皆此物也。其幻類此。至蘇州。拘諸生錄妖書。陸完輩忿欲擊之。走匿。以免。敬方具奏。適王公以巡撫至。疏其罪惡。大致激變。攫取財物元寶至二千餘錠。詔竄敬。僂臣於市。傳首江南。人皆快之。陝西大飢。鄭公巡撫賑濟。多所全活。因疏利國保民五事。盡誠敬以回天意。明理義以杜妖妄。減進貢以蘇民困。息傳奉以抑僥倖。重名器以待有功。辭多切直。上命謫貴州參政。陝西人哭送。若失父母。傳聞至京。上稍厭芳所爲。癸卯冬旱。百禱不應。科道交章論芳。上命中官袁琦傳旨。今後內官傳奉除官。不問有無勅書。俱復奏明白方行。卽日召吏部。降四人黜九人。下六人於獄。皆逃自軍囚者。



餘尙未斥。而人已稱快。厥明大雪。人益謹。謂納諫絀邪。格天之應。十二月二十八日也。孜省者。江西人。爲吏坐贓。楊公以御史巡按。逮問充軍。孜省逃至京師。以符水得幸。授太常丞。比公還朝。卽劾孜省罪惡。不宜典郊廟百神之祀。命改上林苑監。久之。擢禮部侍郎。掌通政事。受密訪察百官賢否。書小帖。以所賜圖書封進。因譖楊公會公。以應天府丞述職。旣辭朝行矣。忽中官傳旨。問吏部何不黜守隨。部以廉能對。乃令具履歷揭帖。明日。又問吏部服闋添註之由。復令奏聞。乃調外任。左遷知南寧府。孜省自是引進奸黨。排擯忠良。後以工部尙書伏誅。僧繼曉者。始以淫術欺誑楚府事敗。走匿京師。其術得售。尊爲法王。出入禁籞。賜美姝十餘。金寶不可勝紀。發內庫銀數十萬兩。西華門外拆毀民居。蓋大鎮國永昌寺。大臣諫官默默。林公以刑部員外郎。備劾芳薦。進繼曉過惡。上怒。下錦衣獄。責三十。降雲南姚州判官。後府經歷吉水張兼素。黻論救。亦下獄。貶石州。尋改師宗知州。乙巳正月元日。星變。王公爲吏書。言俊黻忠直。上悟。傳旨俱復原職。南京用。而黻已卒於家矣。林公今爲雲南按察副使。行部至鶴慶。活佛寺。歲久放光。男女爭施金箔。卽拽而鎔之。得金八百兩。歸諸庫。其持正此類也。劉公在內閣。有酒德。善講經。多談論。不知者或目爲狂躁。然實剛介。敢言。默格君心。後爲同官萬安。劉吉所誣。使邏卒嚇之求退。卽疏致仕歸養。乙巳九月也。父母沒。各廬墓三年。竟得疾卒。人稱其孝。鄭公亦嘗廬墓。有白兔馴擾之異。忠孝大節。世鮮知之。詩曰。有馮有翼。有孝有德。以引以翼。其諸公之謂與。

### 簡除保舉

祖宗時君臣旦夕相見。其於用人尤謹。每吏部具缺。或簡除。或保舉。皆公朝傳旨行之。非中官所敢專也。按永樂七年閏四月。尙書趙軀傳奉聖旨。方賓授兵部尙書。今日便到任。所謂簡除者。此類是也。宣德七年三月。勅諭自今布政按察司及知府有缺。吏部行移在京三品以上保舉。吏部審其所保果當。奏聞量授一職。後犯贓罪。并罰舉者。其績滿不及薦者。會官議其賢否。定黜陟。正統初。有言令不便者。內閣楊文貞公疏謂浮薄不肖之徒。畏不得薦。造爲謗語。欲墮壞先帝之良法。冀得循資格遷轉耳。於是仍舊令。景泰天順以來。或各薦。或會舉。中閒歸於吏部者無幾。成化二年。有舉不當上意者。乃命吏部專行之。四年。又有言其非政體者。上命今後京堂四品以上。吏部具缺。朕自簡除。方面官照正統年間保舉人疑爲中官意也。御史戴用諍令吏部會同內閣。或多官計議。或徑自推舉。從而裁斷之。上曰。此宗祖舊規也。乃敢徇私背公。妄言沮止乎。於是吏科給事中沈瑤等合題。謂兩京四品以上官。陛下既親簡除矣。在外方面。又各保舉。則吏部所司者何事。宜令吏部遇京堂員缺。會同內閣推舉。若方面員缺。會同三品以上官保舉。上命吏部通查典故。十二月。覆題以聞。上曰。祖宗舊規如此。御史給事中乃不欲朕舉行。何邪。中閒顯有情弊。其究治之。自是不復有言。既數月。薦擢者咸愜輿論。乃知文貞之確見也。然近日簡除。權歸吏部。薦舉。惟據撫按。皆不過循資格耳。早朝後。君臣不復相見。故中官傳奉人以爲恥。然則用人出於至公。其必上下交而成泰乎。

成化乙酉。天雨黑黍於襄陽。掬之盈把。彗星見西北隅。長三丈餘。三閱月乃沒。地震屋宇搖動。轟轟有聲。蓋兵兆也。時北方流民聚山中。凡數十萬。推千斤劉爲首。流劫鄧州。官軍捕之。遂糾衆反。以石和尚爲謀主。每戰輒勝。越明年僭號於南漳。事聞。上命撫寧伯朱永爲平虜將軍。總兩京湖廣江西四川諸路兵討之。尚書白圭督其軍。湖廣總兵李震帥土兵至。會永有疾。震分道進攻。大破之。擒千斤劉。已而永痊。擣其巢穴。斬首九百餘級。指揮張英誘執石和尚。又戰於古路山。獲賊子劉聰等百餘輩。并軍械僞印。斬餘孽萬餘級而還。諸將爭功。譖殺張英。人心不平。後賊黨李胡子反。遣都御史項忠用襄人檢討張寬爲鄉導。又討平之。湖湘乃靖。獻俘論功。永進封侯。震封興寧伯。後永征韃虜有功。又征建州。進封公。沒。追封宣平王。諡武毅。功臣異姓王者。自開國六王。靖難二王後。僅見永爾。

### 卜馬益

南京後府經歷卜馬益者。山後人。其子錫。性猛悍。好拳棒。一全真道士自山西來。以此藝干之。館穀於家。久之。謂曰。此一夫勇爾。吾有小術。子盍觀乎。卽磨鈍刀。稍銛。叱令斬府中大槐。凌空而去。有小刀百餘。飛躍隨之。所著柯葉。墜落如雨。夜經門樓。仰望其楣。峻甚。錫戲曰。先生能竦及之乎。笑解其髮。舉手拂之。髮皆直豎。上接屋極。又登清江門。下矚城堙。望見倡家。怒曰。潑賤不良。神明所惡。我當燬其廬。揮袖向天。火從袖出。煜爍徧地。錫急止之。言於益曰。道士正人也。問黃白術。黠化輒成。益以爲真仙。禮敬若父母。縱其出入。益妻妾多麗。道士取其髮呪之。夜迭從門縫奔其臥所。苦其淫毒。涕泣以告。益不勝憤。往守備廳白。

焉。道士被逮，鎖梏輒脫，急塗以狗血，乃囚送京師。會興寧伯李震與參將吳經有隙，經弟綬以舍人從震討劉石，立功，官至千戶。汪直用爲心腹，經使綬譖於直曰：「震嘗窩一全真，學識緯兵法，卽其人也。」直信之，奏下震獄，削爵而誅。道士人皆知事出益父子，而震含冤無以自明。

才力不及

舊制朝覲考察天下官員，其沙汰之目曰老疾、曰罷軟、曰貪酷、曰素行不謹，凡四而已。成化丁未，豐城李裕爲吏部尙書，建言謂遲鈍似軟，偏執似酷，二者於老疾不謹復無所屬，乃創立才力不及、通前爲五。朝廷以其有愛惜人材之意，從之。至今爲例。裕以附李孜省得大用，此其媚衆之術也。又裕每當大選，先二日於後堂中設木牌，上書「皇天鑒之四字」，與二侍郎坐定，文選司官前立，以缺員并選人姓名品第校量筆之於牘。至期引奏畢，對牘填榜，更不移易，且免錯誤。外雖近公，然品第之時，實容私云。凡才力不及者，俱照級調簡，僻衙門用。然人亦無譽之者，此可見天衷之公也。宋立齋端儀曰：「孜省嘗托言神降，有江西人赤心報國之語，以尹太宰旻不右江西人物，乃叶謀擠罷，而用裕代之。又用計罷劉閣老翊，而用泰和尹直代之。起永新劉敷長臺憲，擢高安黃景貳禮部，而新建謝一夔、安成劉宣俱出翰林，競亦附麗。一夔進司空，宣亞吏部，物議喧然。惟羨旻、江何公喬新之介特，予聞都御史王越特爲汪直所厚，旻偕卿貳欲詣直，屬越爲介，私問越跪否。越曰：「安有六卿跪人者乎？」越先入，旻陰伺之。越跪白訖，叩頭出，比見直，旻先跪，諸人皆跪，直大悅。越尤旻，旻曰：「吾自見人跪來，特效之耳。」由此言之，旻未爲賢也。

## 名畫古器

純皇好玩名畫古器。南京西華門舊有二黑漆圓櫃。振之則中空有聲。蓋國初巨室之籍入者。以不可啓視。故棄於此。守關小內使張本。穴而窺之。則畫幅存焉。一爲王維傳色山水。約三丈餘。一爲蘇漢臣所繪。宋高宗瑞應圖。本以王畫送安寧。蘇畫送黃賜。皆太監坐廠守備者。未幾寧死。賜攫得之。併以獻上。賞賚頗多。益加寵任。甲辰二月。宿州農夫墾田。遇古墓。獲鏡及燈臺各一。磨鏡照之。見墓中人僵臥。猶帶弓矢。驚駭。扑之於地。又見農家室戶。男女宛然。以爲怪物。擲之不復顧。獨攜燈臺。鬻於富室。且談及鏡事。其夜燈臺發光如晝。富室以獻於官。時四川崇慶州舉人萬本知州事。得之大喜。寄饋其叔祖萬閣老。安遺書亦道及鏡事。安欲併得鏡以獻上。乃移書索之。甚亟。本遂逮繫農夫追索。了不可得。繫獄三年。安去位。始獲釋。

## 東海二僊

北人劉勛。爲子言東海近出二僊。其一卽張三丰。遼東義州人。張仲安第五子。本名君實。字全一。元元其別字也。自號保和容忍三丰子。元末居寶雞金臺觀。辭世留頌而逝。民人楊軌山爲棺殮。臨窆發視之。復生。乃入蜀。抵秦。居武當。遊襄鄧。往來長安。歷隴岷。甘肅。永樂中。遣都給事中胡濙。道錄任一愚。岷州衛指揮楊永吉。訪求未獲。天順末。或隱或見。上聞之。封通微顯化真人。後往來鶴鳴山半年。迄今不知蹤跡。其詠揚州瓊花。蓋自況也。其一濟南海上老人。初不知其姓字。髮如銀絲。顏如渥赭。雙目澄澈。左手常握而

不開日進生果三枚。水一勺而已。洪武壬午。過濟。永樂閒。復至。成化乙巳。濟南衛指揮朱顯。奏聞有王姓者。傳聞五世祖學道海上。得仙。上召見之。賜姓名王士能。問其年。平陳友諒之歲也。百二十三年矣。貌如四五十許。自言平生惟不食肉。不近女。不爭氣而已。或曰宏治辛亥羽化之日。今東宮誕辰也。予不敢信。漫識之。

虎臣進諫

鳳翔之麟遊。有虎臣者。慷慨有氣節。成化末。貢入太學。適聞萬歲山架棕棚。以備登眺。臣上疏極諫。憲廟奇之。祭酒費闇不知也。懼其賈禍。乃會六堂鳴鼓聲罪。鐵索鎖項以待。俄有官校宣臣至左順門。中官傳溫旨。勞之曰。爾言是也。棕棚卽拆卸矣。命銓選時吏部。予臣七品正官。闇聞而大慚。臣名遂播天下。後知雲南鄂嘉縣。卒於官。楚雄姚鵬哭之以詩曰。獻策當年爲國憂。至今浩氣貫皇州。只期事業垂千古。豈料形骸付一邱。青史有名書虎氏。錦衣無復耀麟遊。蒼天不管忠良士。空使窮荒草木愁。

道具體用

巡撫朱都憲英。與方伯彭鳳儀。韶薦白沙陳公甫於朝。部檄至。彭公作序送行曰。聖人之道。體用具而已。孔子論士。以行己有恥。使命不辱爲先。修孝弟謹言行者次之。大學言明德。而必及新民。中庸語率性。而必及修道。西銘父乾母坤。乃至民胞物與。蓋合内外之道。該本末之事。未嘗偏主獨勝以爲是。而學旣成矣。人不吾知。囂囂若將終身焉。苟知而求我。則起而從之。推所有以及物。以經濟顯揚爲務。未嘗狹視斯

世而曰是何足與言仁義也。亦未嘗厚誣吾民。而曰轉漸澆訛也。於是遂應君命。陳力就列。不出位。不曠官。若遭時行志。則如傳說武侯伊川魯齋其人。揭正義於中天。振斯文於來裔。其烈亦盛矣。或事與時違。則見幾而作。引身以退。而亦不忍歸曲。上下求以吾譽焉。夫用心至於如是。非德充學盛。量洪識遠。豈能爲此大全之學哉。新會陳公甫先生。隱學三十年餘矣。巡撫大臣賢之。薦於朝。下所司勸駕。先生徐白於母。忻然命之行。噫。此斯文正氣之一幾。茲行其必有合哉。一時注想。何異神明。先生亦必有以處之矣。詔忝相知於其行也。贈以詩曰。大道本無外。此學奚支離。人已彼此閒。本末一貫之。是以古人心。包徧無遺遺。卷舒初不滯。動止在隨時。白沙陳夫子。抱道真絕奇。林閒三十載。於學無不窺。術周材亦足。知崇禮愈卑。珠玉雖固闕。山水自含輝。聲名滿四海。薦牘遂交馳。一朝徵書至。八十慈顏嬉。有司勸就道。束書敢遲遲。積誠動天聽。納牖契神機。治化淳以洽。轉移良在茲。及彭公疏梁芳。有弟擾鄉。忤旨調貴州。公甫書贈言曰。忘我而我大不求。勝物而物莫能撓。孟子云。吾善養吾浩然之氣。山林朝市一也。死生常變一也。富貴貧賤夷狄患難一也。而無以動其心。是名曰自得。自得者不累於外。不累於耳目。不累於一切。鳶飛魚躍。其機在我。知此者謂之善學。不知此者雖學無益也。二公之意。蓋以體用交相勸勉者如此。

### 獎賢文

吾廣方伯陳克庵士賢。選嘗作獎賢文曰。保民以固邦本者。臣之忠。教子以盡臣節者。母之賢。賢母忠臣。國家之所褒嘉。方伯連帥之宜獎予也。廣東市舶太監章眷。招集無賴。馴僧數百十人。分布郡邑。專魚鹽。

之利。又私與海外諸番相貿易。金繒寶玉。犀象珍玩之積。鄙鳩不如也。然猶奮其威詐。漁獵民財。無厭。銜冤者莫敢訴。持祿者莫敢問。官府所鞭撻者。囹圄所繫者。皆種禾撈蜆之民耳。由是嶺表之民。不蒙至治之澤。而諸司懾其威。甘遂其非。非惟莫敢問。又從而助其虐。番禺令高瑤。獨毅然不與爲之屈。民有遭其荼毒者。力捍禦之。若衛赤子。謂非保民以固邦本之忠臣不可也。且聞其母賢。恆勵瑤以忠孝大節。古人有言。非是母不生是子。信然哉。予承方伯之乏。於是命廣人作戲綵圖貽之。以示獎予也。噫。斯舉也。豈爲高氏母子哉。爲國家也。爲嶺表之民也。爲食祿者勸也。克庵雅尙澹泊。無異韋布。每食飯一盂。韭數根。或雞子半枚而已。凡事涉風教。必捐俸爲之。日使瞽者振木鐸。以狗道路。置深衣幅巾。擇耆民有德者。子之使教子弟。聽訟不事刑。扑隸人。惟令業巾網於左右。以閑其心。與訟者約。自持一票。詣被告家。使自出詣官。罔不從者。民化其德。皆不忍欺。瑤字庭堅。閩人。丙子鄉貢。涖政廉公有威。縣左有韋眷所創寺。僧不敢杵鐘。眷問其故。曰。畏高正衙耳。及盤眷私貨歸縣庫。以身當之。克庵稱爲古循吏。及克庵奏眷不法。反被誣。就逮。瑤亦落職。束書數筴。載平頭巾。飄然去。士民擁道。涕泣交送之者幾千人。



# 雙槐歲鈔卷第十

## 孝穆誕聖

萬貴妃始爲宮人。司東駕盥櫛。譎智善媚。旣顯寵。居昭德宮。太監段英掌其宮事。與其兄弟子姪萬通萬喜萬達輩。威福赫奕。大學士萬安認爲同族。與劉吉皆附之。朝士無恥希進者。羣趨其門。成化戊子九月。彗星見掃三台。彭文憲公時在內閣。乞歸不允。因疏請修省。謂外廷大政。固所當先。而宮中根本。尤爲至急。凡女子年過四十則無子。雖有所生。亦多不育。諺云。子出多母。今宮嬪數多。宜生子亦衆。然數年無一生育者。必愛有所專。其所專者。必過生育之期故也。伏望舍其舊而新。是圖務正名分。均恩愛。以廣繼嗣。爲宗社大計。則人心安而災異息矣。又言黜陟人材。宜斷自宸衷。不可專委臣下。上優詔答之。己丑九月。幸昭德宮。時皇妣紀氏在御妻之列。旣有娠。萬氏知之。百方苦楚。胎竟不墮。上命出居安樂堂。托言病瘧。庚寅七月己卯。臚。今聖上皇帝誕焉。皇妣乳少。太監張敏使女侍以粉餌哺之。彌月。西內廢后吳氏保抱。惟謹。以未奉命。不敢剪剃胎髮。辛卯十一月。悼恭太子祐極。正位東宮。已而薨於痘。禁中漸傳西宮有一皇子。上心甚念之。然慮爲萬氏所忌。乙未五月。張敏厚結段英。乘萬氏喜時。進言萬氏許之上。卽召見。髮已覆額矣。天性感通。相持泣下。動容出語。矩度不凡。上撫之大喜。萬氏具服進賀。遂令內閣擬名。至再。上親名之。送仁壽宮撫育。中外聞之。胥悅。皇妣受萬氏觴。有疾。徙居西內永壽宮。六月戊寅朔。文武大臣請。

建元良甲申奏上命待皇子稍長行之。是月乙巳皇妣薨。追封淑妃。京師藉藉謂薨於鳩也。十一月始立今上爲皇太子。及登大寶。追尊皇妣。諡曰孝穆皇太后。縣丞徐頊請究皇妣薨逝之由。當時診視太醫院使方賢治中吳衡俱宜逮治。萬安劉吉力請已之。惟訪求皇妣親屬之在廣西者。未幾獠峒有紀姓者。詐冒皇舅。有司信之。遂以上聞。其後敗露。守巡官保奏者皆黜。吾鄉黃僉憲倫亦其一也。旣而用內庭言。皇妣本出李氏。宏治庚戌九月。降制封聖母之父李公爲慶元伯。母唐氏爲伯夫人。命有司建祠於桂林城南。春秋祭享。張敏家本福建同安。成化末年卒。其弟苗以承差廕中書舍人。不三載遷至南京。通政使贈其祖益初如己官。父太常。又以兄敏功贈錦衣千戶。而苗子定庚戌登進士第。或曰內侍潘眞嘗與人言。皇妣諱妙善。入宮時。誤報李爲紀。故二姓族類難究。上孝思追悼不已。念吳后保抱恩。命宮中進膳。如母后禮。復其姪官。爲錦衣百戶。

進御當夕

進御之禮。據註疏。天子女御八十一人。當九夕。世婦二十七人。當三夕。九嬪九人。當一夕。三夫人三人。當一夕。后當一夕。望前卑者先尊者後。望後乃反之。凡十五日而徧。諸侯兩兩而御。姪娣六人。當三夕。二媵當一夕。夫人專一夕。凡五日而徧。至六日還從夫人。如后法。孤卿大夫有妾者。二妾當一夕。內子專一夕。士有妾者。但不得專夕而已。妻則專夕。故內則曰。妻不在。妾御莫敢當夕。然詩小星註。凡妾御於君。不當夕。三禮義宗曰。進御天子者。十五日而徧。自下而上。象月初生。法陰道也。晦明是其所忌。故人君不以月

晦及望御於內。晦者陰滅。望者爭明。故春秋傳曰。晦淫惑疾。明淫心疾。夫妾御與后。並皆當夕。既與詩背。除去望晦。則十五日不得而徧。后以尊在後。遇望反不當夕矣。腐儒陋見。所以啓後世嬖妾顯寵之端也。予謂一日之閒。有朝有晝有夕有夜。夕謂日入星未出時。人君修令而退。王后每夕皆進於王。所以正內治。故妾進御俟夜。不敢當夕。小星詩曰。肅肅宵征。夙夜在公。謂夜見星而往。夙見星而還也。后五日一休。一嬪與其御進。又五日一休。一嬪與其御進。凡四十有五日。而九嬪畢見。故周禮九嬪。掌以時御。敝於王所。女御掌御。敝於王之燕寢者此也。夫人坐論婦禮。在漿人則致飲。掌客則致禮。世婦惟掌喪祭賓客之事。蓋先世女御之老而無子者。爲后六宮官屬。故王制曰。國君不名卿老。世婦則以先世臣妾。在所當敬。故也是進御者。嬪與御而已。夫人世婦不與可知矣。自諸侯大夫以下。雖妾媵有多寡。然皆用五日之制。故內則曰。妾年未滿五十。必與五日之御者此也。詳見羅鄂州集中。

### 御製靜中吟

守成之君。顛冥於崇高富貴者。固不足言。然亦有般憂多難。不能啓聖興邦。發爲詞章。萎靡不振。唐睿宗送司馬子微還天台詩云。紫府求賢士。清溪祖逸人。江湖與城闕。異跡且殊倫。閒有幽棲者。居然厭俗塵。林泉先得性。芝桂欲調神。地道踰嵇嶺。天台接海濱。音徽從此間。萬古一芳春。宣宗避地。有爽溪樓詩云。殿閣連雲接爽溪。鐘聲還與鼓聲齊。長安若問江南事。報道風光在水西。宋高宗中和堂詩云。六龍轉淮海。萬騎臨吳津。王者本無外。駕言蘇遠民。瞻彼草木秀。感此瘡痍新。登堂望嵇山。懷哉夏禹勤。神功既盛。

大後世蒙其仁。願同越勾踐。焦思先吾身。艱難務遵養。聖賢有屈伸。高風動君子。屬意種蠹臣。三詩俱有石刻。絕句則元周伯琦爲僧克新書之者。夫睿宗隕於武墾。而役志幽栖。宣宗窘於會昌。而留連光景。高宗憊於強虜。而自比勾踐。皆志不足以帥氣。氣不足以配道。故爾嘗莊誦。今聖上御製靜中吟曰。習靜調元養此身。此身無恙卽天真。周家八百延光祚。社稷安危在得人。是時召學士張元禎進講太極圖。契於皇心。見於皇言。深符主靜立極。純心用賢之說。蓋不徒聞見之知而已。詞氣渾噩。太極同體。豈彼三君庸瑣之作所可望哉。

午朝奏事

春秋傳曰。朝以聽政。晝以訪問。夕以修令。夜以安身。今之早朝。朝也。午朝。晝也。晚朝。夕也。夜乃卽安。祖宗勤政之典如此。景泰中。午朝許大臣造膝奏事。而決可否。卽施行之。若陳循王文欲殺考官。高文義公力疾造朝。口奏曰。少保臣高穀有事。門上說卽召對。議行是也。宏治庚戌。彗見天津。詔大臣言軍民利病。時政得失。刑部右侍郎彭韶疏言。臣獲隨午朝。竊念日奏尋常起數。於事無補。願自今午朝。惟議經邦急務。如吏部有大陞除。禮部有大災異。戶部兵部有緊急錢糧邊報。工部法司有緊關工程囚犯之類。許令先期開具。奏乞聖駕定日出御左順門。事當會議者。就於御前。公同計議。事體既定。口奏取旨奉行。次日補本備照。若事體重大。一時難決者。聽各官先行博議於下。候至朝時。再議奏行。仍乞溫顏俯詢曲折。如此。不惟世事日熟。而羣臣邪正。亦自可見。有事則行。不分寒暑。無事則止。勿勞聖駕。既不廢午朝之典。又可

率羣臣興事。則凡時政得失。軍民利病。自可次第張弛矣。其言與晝以訪問合。上嘉納之。

### 謫仙亭

鄒吉士汝愚。智謫雷州石城千戶所吏目。道吾廣。有司留館坡山。士民爭先謁焉。其同年蒼梧吳獻臣。延舉尹順德。令邑民李煥於古樓村建亭居之。扁曰謫仙。其父來視。責以不能祿養。箠之。泣受而不辭。宏治辛亥十月卒。獻臣往治其喪。適方伯東山劉公大夏至邑。不暇出迎。廉知其故。反加禮待。共資卹。還其喪。獻臣自是知名。白沙陳公甫追次汝愚詩曰。遷客一亭遺海濱。當時誰號謫仙人。花汀柳市無疆界。盡是乾坤一樣春。獻臣和曰。浮雲浩浩南海濱。落月獨照窮愁人。狼籍幾株桃李盡。謫仙亭上可憐春。趙進士瑣曰。拄頰孤亭野水濱。閨壺風月謫仙人。而今只有殘鷓在。啼老東溟二月春。蔣知縣昇曰。謫仙亭子海之濱。仙去亭空月傍人。二十四番花落盡。一杯誰共送殘春。汝愚四川合州人。秀偉聰悟。弱冠領解首。丁未連第入翰林。其年十月丙子五鼓。有大星飛流。起西北。亘東南。光芒燭地。蜿蜒如龍。朝宁之閒。人馬辟易。蓋陽不能制陰之象也。適詔天下大小衙門政務。如有利所當興。弊所當革者。所在官員人等。指實條具以聞。汝愚疏言。正天下之衙門。當自內閣始。以利弊言之。莫利於君子。莫弊於小人。少師萬安。恃權怙寵。殊無厭足。少師劉吉。附下罔上。漫無可否。太子少保尹直。挾詐懷姦。怙無廉恥。皆小人也。南京兵部尙書致仕王恕。素志忠貞。可任大事。兵部尙書致仕王竑。秉節剛勁。可寢大姦。巡播直隸右都御史彭韶。學識醇正。可決大疑。皆君子也。然君子所以不進。小人所以不退。豈無自哉。宦官陰主之也。陛下法太祖以

待宦官。法太宗以任內閣。則君子可進。小人可退。而天下之治。出於一矣。夫豈不知刑臣之不可弄天綱哉。然一操一縱。卒無定守者。正心之功。未知講也。早朝之後。深居法宮。此心之發。一如事天之時。則天下幸甚。疏上不報。宏治己酉。御史湯鼎坐事。連及。遂下錦衣獄。議坐大辟。刑部侍郎彭公韶辭疾。不爲判案。始獲免。謫死時年二十六。

湯李自相標榜

初。萬安子翼。第進士官。至侍郎。翼子宏璧。丁未復侍雋。其同年麻城李文祥。有才學名。將奉大對。安欲托以孫。因許及第。文祥以正對。乃使宏璧延諸別館致款。屬題畫鳩。文祥卽奮筆作詩。末云。春來風雨尋常事。莫把天恩作己恩。安銜之。文祥每見沉浮世事者。輒叱且詈。上登極。御史湯鼎等。交章薦起三原王公。恕爲吏部尙書。公素禮重風義之士。文祥及鄒智十餘人。與鼎往來。高自標榜。謂鼎爲先鋒。文祥爲大將。餘不能紀。適詔開言路。文祥上新政疏。請一權立法。進賢緹奸。廣言納諫。語過切直。召詣左順門。中官傳詰中興再造等語。以爲不祥。從容辯對而出。旣而得旨。俾佐劇縣。遂補咸寧丞。時王公竑已沒。三原因論薦。召彭公韶爲刑部侍郎。鼎以印馬詣內閣會勅。安與劉吉尹直謂曰。近日詔書裏面。不欲開言路。吾輩扶持言官增之耳。鼎卽以其語劾奏之。數日。召鼎入。諸中官示以疏。已留中。鼎大言疏不出。將併劾諸中官。諸中官稍匿。鼎昂然遂出。益肆志自負。多以疏草示人。又劾都御史馬文升等。復聲言將劾三原。已而安直皆免。鼎與文祥等日夜酣呼。以爲君子進。小人退。雖劉吉尙在。不足忌也。一時直聲震播海內。吉使

門客徐鵬。唱御史魏璋以利使伺。籍家壽州。知州劉概與書言。嘗夢一叟牽牛將入水。籍引之而上。牛近國姓。此國勢瀕危。賴籍復安之兆也。因餽白金爲壽。籍大喜。出書示客。璋以此劾之。草奏以陳景隆爲首。詔捕籍及概。下詔獄。文升時掌都察院。欲坐妖言律斬。三原力救之。乃謫戍甘肅。大理丞缺。吉欲用璋。三原不從。璋竟外補。尋奏召文祥還。授職方主事。居十八日。中書舍人長安吉人以言下獄。乃有媒孽文祥。妄議朝政者。於是被逮成獄。下法司擬罪。當死。會有密解之者。乃從輕降。興隆衛經歷。既抵任。進表南還。大雪中行數百里。至商河城。曲河冰陷。溺死。時年三十。籍後數年始釋放爲民。

### 劉縣花

奪情起復。自天順初。給事中喬毅奏革後。有李文達。羅一峯論之。得謫。成化庚子。內閣劉吉。丁外艱。詔賚以羊酒寶鈔。起復視事。如故。吉三上疏辭。托貴戚萬喜。得不允。陳編修音上書勸其力辭。吉不答。人無敢言者。吉每談笑對客。殊無戚容。丁未。今聖上新政。科道交糾。萬安尹直。以次罷遣。吉獨不動。倚任尤專。慮科道言之。乃傾身阿結。昏夜款門。斬免彈劾。建言欲超遷科道。待以不次之位。會詔量才舉用。廢滯。吉特爲奏陞者。原任給事中賀欽。御史強珍。輩十人。部屬惟員外林俊一人而已。時吏部已次第擬用。而吉爲此者。媚衆也。凡科道爲聖情採納者。悉謂由己。自是人無復有言之者矣。宏治改元。風雹發自天壽山。毀瓦傷物。震驚陵寢。上戒諭羣臣。修省。遣官祭告。於是左春坊庶子兼翰林侍讀張昇。疏言。應天之寶。當以輔導之臣爲先。今天下之人。敢怒而不敢言。以奸邪尙在樞機之地故也。因數吉十罪。且謂李林甫之蜜

口劍腹。賈似道之牢籠言路。合而爲一。其患可勝道哉。伏望陛下奮發乾剛。消此陰慝。拿送法司。明正其罪。則人心悅而天意回矣。科道交章劾昇。指爲輕薄小人。上命謫昇南京工部員外郎。其同鄉何喬新贈以詩曰。鄉邦交誼最相親。忍向離筵勸酒頻。抗疏但求裨聖治。論思端不忝儒臣。自憐石介非狂士。任詆西山是小人。暫別鑾坡非遠謫。莫將辭賦弔靈均。由是人目吉爲劉縣花。以其耐彈也。吉聞而大怒。或告以出自監中一老舉人善談諧者。吉奏允舉人監生三次不中者。不許會試。其擅威福如此。辛亥九月上命撰皇親誥券。吉稽遲俟賄。始惡之。使中書至吉家。勒令致仕。吉疏上卽允。猶令有司月給米五石。歲撥人夫八名。降勅護之還鄉。頻行京城人攔街指曰。唉。縣花去矣。昇尋被召。擢少詹事。而舉人會試亦除禁限。

牛生麟

沈約宋書符瑞志。以麒麟爲首。效周書王會解。凡彙皆訓釋之。至曰玉女天賜妾也。則物彪亦與焉。鄙倍甚矣。予謂諸福之物。當以六籍所載者爲先。文宣朝祥瑞無聞遠邇。永樂甲申八月。騶虞出周郊。二虎隨之。甲午榜葛刺國。乙未麻林國。俱貢麒麟。宣德己酉。來安縣石固山獲騶虞。二是關雎鵲巢之應。畢備於一時也。癸丑閏八月。編修許彬進麒麟獅子福祿元虎四祥詩。福祿番人本名福俚。狀如驃。其文白黑相錯。勻瑩可觀。乃王會所無者。獅子本非瑞應。日食牛羊。百夫扛之。大爲民害。成化戊戌。西夷扣嘉峪關來獻。御史徐綱按甘肅。令守關者勿納。疏上不從。蓋不明言其匪瑞故也。又有馬哈者。如羊而純黑。頭有雙



角其長過腰。馳雞者高七尺。玉鬪元翎而金距。豈王會所謂輝茲文翰之屬邪。如發令以六籍所載四靈之外。無得有獻。則外夷無所售其奸矣。以予所聞。成化甲辰。泗州牛生一麟。恠而殺之。人見其足如馬蹄。黃毛中肉。鱗隱起如半錢。然同時武陵田家牛亦生麟。頭尾及足皆牛。但徧身生鱗。鱗縫中綠毛。茸茸然纖秀。方出胎。見鐵坎倚壁。卽往嚼食。家人擊殺之。其皮見存常德府庫。宏治辛亥。蒲圻白水村鄧榮家牛又生麟。大率類武陵者。不食而死。故荆吳間人言牛在水澤。雲霧濛起。卽有龍與交。因有此異。由此言之。奇祥極瑞。中國所自有。第在人知而象之耳。雖絕外夷之貢可也。

### 籌邊翊治策

吏科給事中閩人林粹夫。廷玉父芝。司訓信宜。母沒。留葬焉。及父遷韓府。紀善。占籍平涼。遂領陝西解首。連第進士。以葬魯都憲。使吾廣。因趨信宜。訪得母墓。慟哭祭之。欲負骨以歸。陳白沙止之。有興皇華共載之句。乃圖山形而去。其至廣西也。詢知狼兵勇悍。皆由土官養以威福。信將出征。籍其姓名。椎牛釀酒。使縱一日之歡。及師還。則譴責其無功退縮者。削其田產。以賞有功。併調陣亡之家。所獲頭畜金帛。盡許入己。故遇敵奮勇。所向皆捷。比在諫垣。宏治改元六月。虜犯大同宣府。詔鎮守等官各陳所見。粹夫上籌邊翊治十策。明賞罰以振軍旅。禁暴掠以安黎庶。革宿弊以清吏治。預處置以成人材。表忠良以垂世教。慎師儒以敦化本。肅禮儀以廣敬畏。普惠澤以恤困窮。舉遺才以昭激勸。究元惡以示鑒戒。大意言虜寇犯邊之時。閒有驍勇軍士。斬獲首級。則冒爲己功。或與所私。奪回頭畜。則盡數入官。追併拷打。其陣亡者。失

律避罪。俱報病死。且不調復其家。使其父母妻子。至於困餒。故得功者。徒爲癡人。陣亡者。空作冤鬼。惟狡滑奔逃。乃得兩全無害。似此賞罰不明。誰肯輸命效死。以邊將受關外重托。而反土官不如。此臣所以三嘆息也。自今恩義以培養於平日。威信以振起於臨時。毋奪士卒之功。毋匿陣亡之報。重退縮之禁。恤死難之家。其奪回頭畜財物。以十分爲率。有主者。四分償勞。六分給付。其無主者。並聽軍士入己。庶幾賞罰明而軍威振矣。王師所過。紀律不嚴。致令軍士搶掠。以充盤費。亦有將帥生事。百端擾索。近聞天花菜一斤。價銀三兩。其餘可知。宜禁戢軍士暴掠。供應毋忒科斂。則邊人蒙福。當不貲矣。內治之脩。在用人才。明賞罰。且如逋逃僧繼曉。奸吏李孜省。方士鄧常恩。趙玉芝輩。姦黨勢焰。傾動一時。皇上洞燭其奸。首行斥逐。然孜省下獄。當矣。而繼曉遺漏不追。家貲鉅萬。日擁美姬。以自娛。玉芝謫戍。宜矣。而其冒濫葬祭。父母墳塋。輝煌如故。非所以昭法戒也。乞勅法司。擒械繼曉。明正其罪。仍行巡按。平毀墳塋。則將來姦宄。知所懲矣。上悉行其言。命錦衣官校。逮繼曉。戮於市。天下快之。

劉王疑冢

南漢劉隱。僭據廣州。傳四世。皆昏虐。多立疑冢。以虞發掘。今北郭外有之。宏治壬子。予覓壽藏白雲之麓。有攜磚來售者。方二尺。厚五寸。上有篆識。曰景定辛酉預備磚。尋又有售碗碟盤盂者。其色黑而潤。若饒磁然。詢其所由來。曰得諸劉王家。往觀藏處。實大墓也。然景定乃宋理宗年號。其非南漢物明矣。廩山人飛卿。雲翼居西城外荔枝灣。犁田得長刀。其銛已盡。而嵌銀文彩。如繡猶新。豈當時昌華苑之遺物與。又

北十里多。整石亦指爲劉王家發之。惟水涓滴而已。蓋所謂明月峽玉液池也。予詠西城古蹟云。江水東流。西日斜。劉郎碁蹟尙天涯。昌華苑外裙腰草。玉液池邊鼓吹蛙。隔隴牛羊聞牧笛。遶林烟火見樵家。當年翠輦曾遊地。留與東風長稻花。

### 天地神化

橫渠曰。一物兩體。氣也。一故神。自註云。兩在故不測。兩故化。自註云。推行於一。蓋天包地外。而氣行乎地中。只一物爾。在陰在陽。消長進退於無窮。故不疾而速。不行而至。所謂陰陽不測者也。一陰一陽。化生萬物。雖是兩體。要之只是推行此一物耳。所謂爲物不貳者也。人測天地之化。因陰陽兩在。而知其神。不特圭臬景晷律琯葭灰而已。漢志曰。天子陳八音。聽樂均。冬至陽氣應。則樂均清。景長極。黃鐘通。土灰輕。而衡仰。夏至陰氣應。則樂均濁。景短極。蕤賓通。土灰重。而衡低。此卽周官大合樂分陰陽之遺法也。以聲召氣。故神祇可得而禮。執是以爲南北郊。則誤矣。記曰。人者。天地之心也。其氣。天地之塞也。飲食暖於心。既久而達於四肢。此可以體天地之化。刺割抑搔。纔及於膚。而心卽悟。此可以體天地之神。又何待外求哉。

### 名字稱呼

文質迭爲盛衰。觀於名字稱呼。亦自可見。漢孔安國。唐郭子儀。皆以名爲字。逮宋鮮矣。我朝淳風。超出漢唐。洪武至天順。登科錄多有之。成化己丑。進士曹時中。字時中。張禎叔。字禎叔。廖德徵。字德徵。此後始罕見耳。惟吉水彭氏兄弟。敬占道術。教以主一用二。貴三崇四。數五爲字。人甚異之。又有張用也。孫繼兮。則

新奇甚矣。書簡稱人以閣下明公。自稱不過侍生而已。足下友生。又其常者。方韓都憲之涖兩廣也。首斬一指揮以令衆。藩臬謁見。卽行跪禮。旣平大藤峽。其威張甚。然吾郡吳太守。中聘教授王文鳳。脩郡志。公聞之。以所得書簡附入。惟曰賀都御史韓雍平兩廣書。其中大司馬王公。稱竝拜書復都憲。永熙知己閣下。大宗伯姚公。稱夔頓首都堂。永熙年兄閣下。少司徒薛公。稱遠百拜奉書。永熙都憲年兄行臺。邢太守稱侍生。宥百拜奉書。都堂先生執事。順德錢大尹。稱鄉生溥端。肅奉復總督巡撫都堂閣下。按薛邢皆瓊州人。錢又屬吏。未嘗有所諂也。相去未久。乃有治生晚生。與門下臺下諸稱。平交或號而不字。官尊齒邵。則繫以翁。或稱老先生。不一而足。豈亦文盛之會哉。

給由賑濟

吏部舊例。凡在外官員考滿。給由至部。必察其行能。審其年貌。從公考覈。稱職平常及不稱職。以憑黜陟。惟雲貴軍職首領遠者。及驛遞等官在外者。各赴本布政司。南直隸者。赴南京吏部。北直隸者。亦赴本部。成化甲辰。預備饑荒。始令被災所在。三年六年考滿官員。四品納米六十石。五品五十石。六七品四十石。八九品三十石。雜職二十五石。俱聽巡撫官撥。缺糧倉分納完。回任管事。免其赴部。惟造完須知功蹟牌冊。并通關。差人繳部而已。宏治庚戌三月。三原公會題。略謂各官廩祿有限。而雜職之俸尤微。苟非取於公。必至剝於下。貪惰之風。由茲而起。考課之法。廢格不行。中間雖有老儒貪酷。無從辨驗。是非臧否。混於一途矣。今後遇有災傷所在。缺米賑濟。許令有司措置。其考滿者。俱要赴部。給由照例考覈。上從之。予按。

舊制給由者。條陳本處民情吏病。自行具奏。於鴻臚寺引見之日。徑赴進呈。永樂初元。江西左參議孫浩。廣東副使鄒佑。考滿給由。違此。遂蒙拿問。最宜復也。宜革者既革。而宜復者不復。何哉。

### 瀋陽雞異

河間瀋陽中屯衛前千戶胡泰。母死已十年。父亦再娶。宏治己酉。泰夢亡母告曰。我已托生爲雌雞。毛色黠黃。明日當爲某屯軍贄儀。至則好收養之。明日泰偶出。果有荷米食及鷄至者。卽欲烹雞餉之。雞人言曰。毋烹我。且待泰兒回家。人大驚異。及泰回。繞身喃喃。敍及家事。泰告父以夢徵。乃畜不殺。後益作孽。飛啄後妻面首。且自矜存時幹創艱難。今家業日耗。皆夫縱後妻之故。詬罵不已。遠近聞之。借觀者衆。泰拒不納。無何。後妻遂入炕下。撲殺之。考諸五行志。近鷄禍也。

### 木蘭復見

南京淮清橋女子黃善聰者。年十二。失母。有姊已嫁人矣。父販線香爲業。往來廬鳳間。憐其幼。且無母。又不可寄食於姊。乃令爲男子飾。攜之旅遊者數年。父死。詭姓名爲張勝。有李英者。亦販線香。自故鄉來。不知其女也。因結爲火伴。與同寢食者踰年。恆稱疾不脫衣襪。洩溺必以夜。宏治辛亥正月。與英偕還南京。已年二十矣。突然峨眉巾。往見其姊。姊謂我本無弟。惟小妹隨父在外爾。胡爲來。乃笑曰。我卽善聰也。泣語之故。姊惡之曰。男女同處。何以自明。汝辱我家矣。因拒不納。善聰不勝其憤。謂曰。妹此身却要分明。苟有汚玷。死未晚也。姊呼穠婆視之。果處子。始返初服。越三日。英來候。善聰出見。英大驚愕。歸快快如有所失。

飲食頓減。英母憂之。以英猶未娶。乃求婚焉。善聰執不從。曰。此身若竟歸英。人其謂我何。所親與鄰里交勸。則涕泣。詬之事。聞三廠。勒爲夫婦。且助其奩具。成婚之日。人有歌之者。以爲木蘭。復見於今日云。予按。女易男飾。後返初服者。南齊時有東陽婁逞。五代時有臨卽黃崇嘏。國初蜀有韓貞女。蓋不獨善聰也。

長幼禮嚴

中原西北士大夫。長幼之禮甚嚴。年長者每呼姓名。飲酒獻酬。幼者必跪。初不計貴賤也。山西雍憲副世隆。奉性氣廉厲。凜不可犯。既貴。便道過家。往訪同窗舊友王生。時生已棄士業農矣。遇諸途。謂曰。雍泰乃念貧賤之交乎。倘不棄予。約期訪汝。韋曲泰敬諾而歸。至期冠帶以俟。生布衣襤褸。背隻雞持瓢酒。至據正席而坐。泰以兄事之。與飲必跪。生亦直受之。不辭。泰後爲都憲。巡撫宣府。風度稜峻。參將李傑來見。不與爲禮。傑頗不法。卽數其罪。呼左右縛傑。使跪庭下。大棍撻之三十。坐是罷官。其宦轍所至。輒有遺愛。人謂與華岳爭高。詩云。柔亦不茹。剛亦不吐。不侮矜寡。不畏彊禦。足以當之矣。泰陝西咸寧人。

聖賢後裔

宣聖五傳曰順者。魏封魯文信君。又二傳曰鮒者。秦封魯國文通君。其後侯于漢。進封公。唐襲封文宣公。宋南渡。改衍聖公。金又增世襲曲阜令。元因之。我朝洪武初。詔並如舊制。仍免孔氏差發。仁廟賜衍聖公甲第於東華門北。景帝賜三臺銀印。玉帶麒麟襲衣。皆前所未有也。永樂丙戌。試乙榜舉人。賜冠帶。太學讀書。以孔諤聖人後。授春坊左中允。景泰甲戌。會試中式。孔公恂聞母喪。上知之。命翰林給紙筆。俾就殿

試。賜進士出身。服闋。授禮科給事中。後擢少詹事。兼左諭德。輔憲廟於東宮。正統初。浙江僉事彭貫奏。宋衍聖公孔端友。從高宗南渡。留居衢州。遺祭田五頃。當給賜。詔如所請。宏治癸丑。用守臣言。端友遠孫彥繩。嫡派也。命爲翰林五經博士。世襲主衢廟祀。先是景泰辛未。擇顏子之後希惠。孟子之後希文。授翰林。世襲五經博士。誠意伯劉基七世孫。祿官亦如之。僉謂不類。宏治壬子。上念開國功臣。六王惟中山黔寧子孫世公。而開平岐陽寧河東甌。皆爲編氓。乃徵其裔孫常復。李璿。鄧炳。湯紹宗。並授南京錦衣衛指揮使。禮科給事中吳仕偉。言誠意伯後。不當爲博士。於是錄基九世孫瑜爲處州衛世襲指揮使。聖賢後裔。自此不混於功臣矣。

### 裴周二大魁

唐高鏐爲禮部侍郎。知貢舉。唐書稱其頗得才實。然撫言載裴思謙自攜仇士良一緘。入貢院。易紫衣。趨至階下。白曰。軍容有狀。薦裴思謙秀才。鏐接之。書中與求巍峨。思謙曰。卑吏奉軍容處分。裴秀才非狀元。請侍郎不放。鏐俯首良久曰。然則略要見裴學士。思謙曰。卑吏便是也。鏐不得已。從之。洪容齋謂鏐狗凶。璫意。以爲舉首。史謂才實。恐不然也。宋理宗開慶元年。太平州人周震炎。附丁大全。及省試得雋。大全竊御題示之。卽豫構數千言。大全力薦。遂擢第一。旣唱名。大全進賀曰。此太平狀元也。上大悅。公卿向嘗見其在大全私第。執役如奴隸。物議喧駭。而不敢言。是年大全敗。追奪震炎恩例。降名五甲。二大魁倖進。乃爾。亦可歎哉。或謂國朝吉安人當路。曾棨等三人及第。出吉安。福建人當路。林震等三人及第。皆出福建。

恐亦氣機所孚。非徇私也。然成化甲辰。宏治庚戌。首大對者。皆行不逮文。追降之制。似亦宜復。

何孝子

何孝子子完。字新惠之博羅人。少失父。事母至孝。有傳其事者可異焉。其詞曰。宇新母死。貧不能葬。鄉人感其行。無遠邇爭賻之。發引致奠。至七十餘筵。遇積雨不止。及輻車屆道。隨在輒晴。雨若爲之迂避者。旣葬。縛草廬墓側。夜有虎蹲其門。宇新祝曰。罪惡之人。孤哀萬死。盍蚤食我。毋徒相怖。穴壁覘之。二虎左右馴如也。迨曉散去。夜輒復至。每浹旬則易二新者。猶瓜代然。宇新忽得危疾。鄉人舁歸治之。其家在城市。虎亦尾之去。疾愈還墓。則虎又來。遂視之。若素蒙者。家無應役三尺之童。畜一黃犬。每三五日輒候墓所。每有所需。卽書片紙繫其頸。家人見之。具備繫使負還。似此孝感不一。士庶百餘人。白其事於藩司。及具奏。有旨旌其門。後宇新第鄉貢。入南監。蘇人錢士宏者。與之友善。見其近體衣。尙結衰絞帶。牢不可解。以示終身之喪云。宇新嘗求李西涯諸名公。爲作廬墓詩。陳白沙封其卷。題詩有直從天地閉。三冬之句。惜其自爆也。近聞吉水羅孝子璋居母喪。廬墓螺子山下。亦有馴虎狎犬之異。與宇新事頗相類。

進士教職長史

進士教職授長史。皆窮途也。然有自窮轉達者。洪武庚戌。仁和儒士俞友仁領薦。辛亥。取會元。賜第在三甲。筮仕丞長山。辭不能吏。改襄陽教諭。後調諸城而終。錢塘王儀之。羽年十九。領首薦。辛未。進士。歷儀制郎中。陸太常少卿。乞歸。改掌教餘杭。卒。永樂乙未。進士。第二人李貞。第三人陳景著。皆久於編修。乞便養。



貞得高州教授。景著得福州教授。俱不遷而沒。宏治庚戌進士無錫楊文達。作縣教授金華。今陞南監丞矣。其達可量邪。授長史者永樂甲申進士第三人周孟簡。自詹事府丞擢襄府。周忱自刑部主事擢越府。天順庚辰。德王出閣。選進士楊完劉誠雷霖屈祥。授翰林檢討。俾侍講讀。已而完祥擢德府。誠擢秀府。孟簡終於長史。成化己丑。李昊亦授檢討。擢忻府。其後越秀忻三王。早世無子。國除。忱改工部侍郎。誠改寧國同知。陞湖廣參議。昊改南禮科。擢浙江參議。獨霖擢副使。提學山西。其不可料如此。宏治庚戌。興王出閣。選檢討進士何洽楊鐸劉溥徐法得與。而法輒憤閔。吏部併洽等皆奏黜之。而別銓其同年前列者張景明袁宗臯爲左右長史。遂不敢辭。宗臯。吾廣方伯凱之子也。

### 哈密

哈密在西北大磧之外。本古伊吾廬。乃蒙古回回雜處之國也。地居平川。城周四里。開二門。其東有溪。西北流。爲鹹鹵。閒有楸杏。農耕惟麥及豌豆二種。其北天山與瓦剌相界。西接火州。爲諸胡要路。唐置伊州。至元有肅王忽納失里者。鎮其地。卒。弟安克帖木兒嗣。永樂元年來朝貢馬。二年設哈密衛。改封忠順王。三年爲可汗。鬼力赤毒死。無子。兄子脫脫。自幼俘入中國。廉得其祖母。速可失里。併還之。命襲王爵。賜以金印玉帶。官其頭目爲指揮千百戶。鎮撫經歷。以周安爲長史。劉行爲紀善。而安克帖木兒妻屬反。依鬼力赤。其後脫脫酗酒病死。九年十月。封其從父之子免力帖木兒爲忠義王。掌事以俟其子長成。宣德元年。免力帖木兒死。封脫脫子卜答失里爲忠順王。三年。以其幼不更事。仍封免力之子脫歡帖木兒爲忠

義王以輔之。天順中，忠順王卜列革傳孛羅帖木兒與脫歡之後俱絕。王母理國事，成化癸巳，土魯番王鎖檀阿力侵哈密，虜王母金印以去。其衆逃居肅州及苦峪城。戊戌，鎖檀阿力死，子阿黑麻立。先是哈密相婚姻者凡三種，曰回回，曰畏兀兒，曰哈喇灰。王母外甥都督罕慎，畏兀兒人也。寓甘州。壬寅，甘肅守臣請封罕慎爲忠順王，從之。甲辰，遣使送入哈密。宏治改元，阿黑麻以罕慎非肅王後，乃假結婚而殺之。尋遣使入貢求封。朝廷璽書切責。辛亥，王母已死，乃歸城池金印。會曲先安定王朝貢，自稱忠順王裔。蓋奸人教之，其實非也。兵書馬文升誤聽三種頭目告保，遂立安定王姪陝巴爲忠順王。識者曰：夷虜貴種類，曲先本西戎，安定本韃靼別部，強合爲一，又與罕慎異矣。土魯番必不心服。阿黑麻聞之，果怒。癸丑，復虜陝巴及金印以去。報至上，命兵侍張海都督緱謙率其頭目寫亦滿速兒等往經略之。甲寅三月，還以無成功。海降參政謙，閒往滿速兒等四十餘人，俱安置閩廣。閉嘉峪關，絕不與通。蓋土魯番距哈密七百里，恃其險遠，至是益橫。然兵馬亦少，使大軍及罕東衛番兵從捷徑，出其不意，襲之可擒也。今聞用此策，然大軍不出，恐終難靖耳。

鳶魚辯

程子曰：鳶飛魚躍一段，子思喫緊爲人處，與必有事焉而勿正心之意同。會得時，活潑潑地。又曰：自再見茂叔後，吟風弄月以歸，有吾與點也之意。陳公甫合言之曰：舞雩三三兩兩，正在勿忘勿坐之間。會點些兒活計，被孟子一口打併出來，便都是鳶飛魚躍。又與陳護湛雨詩云：君若問鳶魚，鳶魚體本虛。我拈言

外意。六籍也。無書。陳益庵夢祥騷作辯曰。道具體用。體則天命之性。用則率性之道也。性道皆實理所爲。故曰誠者物之終始。體何嘗虛邪。六經所以載道。一字一義。皆聖賢實理之所寓。實心之所發。以之發言。則言必有物。以之措行。則行必有恆。故曰君子學以致其道。書何嘗無邪。以實爲虛。幻也。以有爲無。妄也。其曰言外意。卽佛老幻妄之意。非聖人之蘊也。予謂公甫意從程子來想。是會得時。不必深辯耳。甲寅三月。予自香山省稼。回至白沙訪之。雨後躡草屨護鞋而往。相見大笑。講話竟日。各賦一詩而別。予末云。吟弄不知春已暮。滿天風月玉臺巾。蓋許以與點之意。公甫末云。與話平生燈火事。羞看白髮滿烏巾。豈以予老猶耽六籍。故云爾乎。不可知也。持其翰歸涂。通府見之。酷愛。遂取去。其爲世寶重如此。

一月千江

宋景濂序瑞巖和尚語錄云。人生而靜。性本圓明。如大月輪。光明徧照。凡蘇迷虛境界。具濕性者。大而河海。小而沼沚。莫不有月。而中天之月。未嘗分也。月譬則性也。水譬則境也。曹端夫首倡理學。以月川自號。豈有取於月映萬川之喻與。薛文清曰。萬川總是一月光。萬物體統一太極也。川川各具一月光。物物各具一太極也。佛氏書謂一月普現一切水。一切水月一月攝。得此意矣。陳公甫嘗作西江月二闋。張學士元禎和韻云。一月千江千月。一通萬感萬通。先生何必苦加功。無用中藏有用。一個法身如粟。大千有象皆籠。不須淘淨不須鎔。本自無迎無送。了了千條萬緒。皇皇四達八通。入頭下手怎施功。外面中間夾用。眼孔毫芒洞見。肚皮天樣包籠。聖賢坯璞此陶鎔。船快更加風送。鄒汝愚亦嘗著論曰。天下豈有性外之

物哉。嘗觀諸月矣。出沒乎丹崖青壁之上者。月也。容與乎虛室空谷之間者。月也。蕩乎江。止乎淵。依乎樹杪者。月也。古人之所見者。月也。今人之所見者。月也。其爲月也。豈有異乎哉。視宋薛稍廣。予按程子謂佛氏言性。猶太陽之下置器。其間方圓大小不同。特欲傾此於彼爾。然在太陽幾時動。是日亦可喻。不獨月也。夫中者天下之大本。性固萬理之一源。又奚必取諸禪名理而取諸禪。吾儒其衰矣夫。

子陵太白

嚴子陵足加帝腹。感動星象。高風不可尙已。李太白使力士脫鞵。貴妃捧硯。亦一世之豪也。摛詞者無容喙矣。近見柳倅桑思元悅客星亭記。乃謂客星有五。曰周伯。曰老子。曰王蓬絮。曰國皇。曰溫星。凡有所犯。無不菑凶。後漢天文志。客星居周野。光武崩應之。於此不書。似因子陵而諱占也。且犯帝座。與晉劉聰時入紫微同。其太史康相以爲非常之變。聰遂滅亡。光武無其應者。豈非政鮮闕失。卽目前下賢一事。亦可弭其菑患歟。然世常擬子陵爲客星者。蓋於其名。而不於其實也。濟寧城南有太白酒樓。古今題詠甚多。予同年謝同知國賢。延舉傳誦一律云。詩聖推刪後。風流襲晉餘。一生惟麴蘖。千首半裙裾。飛燕真危語。騎鯨豈信書。參乎愛手足。爭肯飼江魚。乃劉進士承華愷所作。嗟乎。自商公去位後。卽有戴御史疏譽汪直。遂復西廠。得驟遷。愷亦從風而靡者。乃爾敢侮太白邪。太白當明皇直奴視力士。其譖於貴妃。以飛燕新粧之句。得左謫。正其讜論。反以危語見嘲。視悅尤爲謬矣。

邱文莊公言行

宏治乙卯春二月戊午少保邱公薨於位。概其平生不可及者有三。自少至老。手不釋卷。其好學一也。詩文滿天下。絕不爲中官作。其介慎二也。歷官四十載。俸祿所入。惟得指揮張淮一園而已。京師城東私第。始終不易。其廉靜三也。家積書萬卷。與人談古今名理。衰衰不休。爲學以自得爲本。以循禮爲要。成化初。予寓京師。得長子名之曰都生。公願子易以都得。取自得之義也。陳主事最衣繡。信公聞喪。面斥曰。旣不能以禮自處。又不能以禮處人。自學士爲祭酒。最久。任所著大學衍義補世史正綱家禮儀節。每遇名流。必質問辯難。以求至當。皆足傳世。成化癸卯。陳白沙至京。與談不合。人謂公沮之。不得留用。時猶未入閣也。安有沮之之事乎。及入閣。與太宰王三原。皆太子太保。偶坐其上。三原嘖有煩言。會太醫院判劉文泰失職。奏三原變亂選法。以所刻傳封進。內多詳述留中之疏。上責其賣直沽名。致仕去。人以教計議公。公實不知也。謝侍郎鐸至。形諸言論。訾其著述。劉學士健謂曰。邱仲深有一屋散錢。只欠索子。公曰。劉希賢有一屋索子。只欠散錢。健默然甚愧。又嘗勸其門生王整。謝遷二學士。讀書循禮。毋狎飲廢事。至面檢毛。修撰澄廷對策。多出小學史斷。全無自得。以故翰林後進多憾之。揆公素履。於諡法例得文正文清。而整諡文莊者。其以此夫。

### 保舉神童

宏治乙卯。吾鄉西溪張御史叔亨。奏按雲南。會鎮守太監劉昶。總兵黔國公沐琮。巡撫都御史張浩。保舉神童董元者。紹興人。知雲南府復次子也。八歲時。能詩翰。詠胡桃曰。形狀如鷄子。剛柔實未分。擘開混沌。

穀渾是一團仁。梅月曰：夢覺羅浮夜已闌，碧天雲靜月團團。玉人不學桃花面，淨洗紅粧鏡裏看。九歲以來，真楷草書歌賦序記及三場文字，亦皆能之。今十三矣。請查照李東陽程敏政楊一清洪鐘事例，考送翰林院讀書。疏上，上召試，不如所言，命還籍。乃充會稽縣學生。更名玘。予按敏政一清及鐘，皆由翰林院秀才登進士，而鐘授中書舍人，天死。時年十八，惟東陽雖受上知，然爲順天府學生登第，未嘗讀書翰林也。今爲學士，與敏政一清俱將大拜矣，玘其可量邪。

修省直言

宏治乙卯二月洮州雨霜，六月黦歛雨豆，七月大雨雹，八月貴州地震，九月吾廣潮瓊颶風暴雨，十月南京地震，南贛大疫，十一月貴州陝西地震，十二月靖虜衛天鼓鳴長河，江西大震電，禮部以聞，上令兩京文武羣臣同加修省，直言無隱。於是戶部主事蕪湖胡仲光，燿疏言地震之類，災之小者也。西北旱癘，父子相食，東南饑疫，骨肉流離，大變也。陛下深居九重，左右蒙蔽，未之知耳。今李廣楊鵬引用劉良輔輩，左道惑亂聖心，齋醮糜費財用，差遣在外，如虎橫行，吞噬無厭，其耗天下不可言矣。士大夫昏夜乞哀於宦官，貴戚交相賄托，不以爲恥，言官有所舉劾，瞻前顧後，苟且塞責。如小吏徐珪忠義敢言，陛下誤聽奸臣之愬，置之於法。御史王槐依阿罪之，陛下所以奉行天地之事，羣臣所以奉行陛下之事者如此。陰盛陽微，炎異曷由弭乎？乞用臣言，則奸佞斥而陰匿消矣。疏入，人爲燻危之，未幾廣輩果以賊敗，由燻啓之也。今上仁明神聖，真可與堯舜比隆矣。

## 雙槐歲鈔後序

夫。上。不。足。以。厚。人。倫。統。世。教。下。不。足。以。紀。名。物。經。變。故。近。不。足。以。彰。鴻。烈。闡。幽。光。遠。不。足。以。垂。遺。憲。綦。後。鑒。者。君。子。不。書。也。恩。生。也。晚。不。足。以。窺。古。作。者。之。意。然。竊。聞。之。記。事。載。言。者。必。文。直。事。核。求。不。謬。於。此。而。已。嘉。靖。歲。丁。未。恩。受。從。化。之。役。閒。抵。郡。城。得。請。見。於。泰。泉。先。生。出。是。編。見。示。恩。受。而。讀。之。知。爲。先。生。王。父。長。樂。公。所。著。其。曰。雙。槐。者。公。燕。息。之。至。也。曰。歲。鈔。者。遜。作。者。之。名。也。紀。述。起。於。景。泰。丙。子。迄。於。宏。治。乙。卯。首。之。以。神。功。峻。烈。以。尊。君。也。繼。之。以。嘉。言。善。行。以。徵。獻。也。參。之。以。祥。瑞。災。眚。以。示。儆。也。博。之。以。禳。物。撰。德。以。遊。藝。也。或。標。其。餘。緒。而。條。目。以。舉。或。撮。其。樞。要。而。幾。微。以。著。其。文。直。而。肆。其。旨。幽。而。顯。其。要。歸。一。折。之。於。道。信。良。史。之。遺。也。昔。左。史。倚。相。能。讀。三。墳。五。典。八。索。九。邱。東。方。朔。好。古。傳。經。術。博。觀。外。家。之。語。公。之。綜。核。非。斯。人。之。儔。與。公。始。以。鄉。薦。入。太。學。卽。上。六。事。幾。觸。忌。諱。及。蒞。長。樂。能。剖。析。滯。寃。諸。所。施。爲。蓋。不。負。所。學。矣。然。甫。試。邑。遂。解。組。而。歸。其。論。撰。止。此。蓋。自。其。所。聞。見。而。筆。之。示。傳。信。也。使。公。敷。歷。華。要。以。紬。金。匱。石。室。之。藏。其。可。傳。者。願。若。是。邪。今。先。生。以。宏。材。碩。學。蔚。爲。儒。宗。其。所。載。記。及。郡。邑。志。乘。已。不。下。數。十。種。矣。將。來。勒。成。聖。代。一。經。貽。之。永。久。必。有。以。續。是。編。之。所。未。及。者。昔。司。馬。遷。成。史。談。之。志。業。韋。賢。傳。祖。孟。之。詩。禮。雖。不。敢。以。擬。諸。先。生。而。繼。述。之。迹。則。似。之。矣。於。戲。公。之。績。學。種。德。將。據。忠。以。匡。時。也。而。著。此。以。見。志。先。生。惟。恐。遏。迭。其。光。而。刊。布。以。流。無。窮。易。曰。可。久。則。賢。人。之。德。可。大。則。賢。人。之。業。然。則。忠。孝。之。久。且。大。者。亦。少。

概見矣乎。恩先生督學時門人也。忘其謏陋。謹識末簡。以質諸知言者焉。嘉靖戊申孟秋吉日門下晚生灌陽呂天恩謹書。



# 跋

右雙槐歲鈔十卷。明香山黃瑜廷美撰。按通志。先生棄官歸。徙居會城番山下。手植槐二。構亭吟嘯其中。自稱雙槐老人。因以名其文集。及此書也。今越山下數武。有雙槐洞者。殆卽其故居歟。明史藝文志。黃瑜雙槐歲鈔十卷。注起洪武迄成化中事。然如古注疏。過撰九六。秦新名諱。銜甲吐卷等。十數條。亦不僅專言明事也。又如金尙書際遇。己巳禦虜諸將。卜馬益數條。王世貞史乘刊誤。皆譏其失實。又如所云孝宗曾贈后父李公爲慶元伯。沈德符野獲編。亦疑其未確。而山阜變占一條。則又援其說以爲證。蓋傳聞之詞。彼此互異。卽操史筆者。固不能比而同之矣。何良俊四友齋叢說。則謂其載憲廟時事。頗爲詳實。如六臣忠讜。邱文莊言行。名字稱呼。長幼禮嚴諸條。皆備載之云。錄出以俟作史者。則亦明代野史中難得之書矣。是書元孫達卿重刻於康熙甲子。迄今傳本寥寥。爰爲校正數十訛字。而重刊之。辛卯花朝後學伍元薇謹跋。